

天台山全志

天台山全志卷十六

楚郢張聯元覺菴輯

赤城山詩

顧况

吳人字通翁官止著作郎自號華陽山人

從剡溪至赤城

靈溪宿處接靈山  
窈窕高樓向月閒  
夜半鶴聲殘夢裏  
猶疑琴曲洞房間

項斯

病中懷王展先輩

枕上用心靜  
唯應改舊時  
强行休去早  
暫臥起還遲  
因

說來歸處却愁初病時赤城山下寺無計得相隨

蘇軾

字子瞻號東坡居士累官翰林學士謚文忠

贈杜介遊赤城

我夢遊天台橫空石橋小松風吹茵露翠濕香嫋嫋應  
眞飛錫過絕澗度雲鳥舉意欲從之脩然已松杪覺來  
如墮空耿耿窗戶曉羣生陷迷網獨達從古少杜叟子  
何人長嘯萬物表妻子空四壁振策念輕矯遂爲赤城  
遊飛步凌縹渺問禪不歸舍屢爲瓢壺繞何人識此志  
佛眼自照燎

曹文晦

天台人字伯輝鄞尹許廣大以教諭薦不赴  
萊室號新山道人夏赤城序其詩集

登赤城山

赤城霞起建高標萬丈紅光映碧寥美人不捲錦繡段  
仙翁瀉下丹砂氣連海嶼貫旭日光入溪甕生春潮  
我欲結爲五色珮碧桃花下呼周喬

左贊

赤城

夙愛赤城好遊觀忘路賒石屏畱野火雉堞起朝霞想  
近臙脂嶺疑藏勾漏砂月明丹鳳下啣落絳桃花

許爵

赤城避暑

海上仙人宅重重幔綵霞絳宮迷草樹丹竈護龍蛇寒  
溜通雲竇晴空散雨花石牀無些暑清夢遶天涯

范理

遊赤城

軒冕信羈人佳遊久未展偶歸事冥搜猛欲窮嵯巘紺  
宇雲尚封苔堦未經踐山露染衣裾澗水清且淺緇侶  
忻相延經聲聞更遠超然志慮空塵念無煩遣赤日已  
西移忘却行騎轉

賈恒

天台人字一之號白齋著有白齋集

赤城僧房

一龕佛像一函經滿屋閒雲不見僧我入雲迎出雲送  
可無題作訪雲亭

鄭善夫

遊赤城

碧海春信至赤城愁思深雪消千澗疾日落萬山陰畢  
歲皆行役凡軀故滯淫西歸負良友忽爾長蓬心

諸葛義

遊赤城

紫崖列雉儼層城雲氣蒸霞海日生竹徑陰分烏恰爽  
松風涼遡道衣輕嶺紆佛隴開銀地洞敞仙家近玉京

方外幽期兼吏隱中林猿鶴漫相驚

薛三省

遊赤城

出郭俯清溪遠覓天台嶠望中赤城秀餐霞饑可療層  
層紫疊玉巉頂方壺肖晴日相輝映朝華夕朗照浮圖  
入雲平空洞窺元竅主人借地勝遲客共登眺悠然會  
予心臨風發高嘯

王明汲

遊赤城

幾年曾慕赤城霞此日登臨興更賒出郭已知無俗事

捫蘿漸覺近仙家  
玉京煙靄丹崖迥  
石洞雲封古徑斜  
借問桃源路何處  
一溪流水泛胡麻

陳子龍

遊赤城

緩步升山紀驅車降木杪  
豁達平野闊逶迤羣溪遶  
迢望赤城亭亭麗雲表  
紺石冠疎峰絳綃卷清昊  
崢嶸天際靜蕭瑟秋氣杳  
獨竦丹嶂艷遙娟翠屏曉  
晴暉動燿燦陰霞觸縹緲  
層磴接青松風煙含碧鳥  
象越情屢遷景愜意恣討  
北亘首名嶽東憑對靈鳥  
會當褰荔裳宵塗展游眺



蔣鳴玉

字楚珍金壇人崇禎丁丑進士任台州司理

遊赤城

佛國名山有化工晴霞積雪映遙空天邊去鳥仍留白  
海上扶桑始上紅五嶽披圖形獨異三台作吏興還同  
攜筇直到荒煙窟華頂寒雲指顧中

顏邁

赤城

紫芝瑤草間春葩台嶽南門景未遐古塔凌雲妃子蹟  
層巖削玉羽人家泉飛峭壁疑寒雨天引孤筇放晚霞  
徐市不還勾漏遠何如到此覓丹砂

俞谷龍

登赤城

赤城之巔雲與齊風櫺月角丹爲梯夜傍銀河宿牛女  
朝連貝闕聞天雞聳身直上煙霞起趁此扶搖九萬里  
下視黃埃濁世人循牆跬步徒爾爾

何紘度

臨海人號石湖順治壬辰進士山西臨晉令

華頂返赤城途中

晨興徑紆複百卉露華滋山高勢方下人歸力益疲舍  
輿慮苔滑展步防路岐引領逐飛鳥希光沐清曦葳蕤  
嘉樹密參錯阪田欹孤巖凌心越涼颼絕端窺術阡目

有待靈境情堪怡縱遊懷寒拾棲真冀由隨須臾金碧  
象綢繆僧宿期慨歎地漸近仰望天低垂攀蘿出赤城  
觸石麗金枝隱隱洞九曲悠悠月半規日暮企彼美清  
脩良自持

施閏章

號愚山宣城人順治壬辰進士官翰林院侍  
讀學士著有

登赤城

靈域非遐壤丹樓聳天造木末出層標雲歸展衆妙玲  
瓏初景明爛熳夕陽照紆磴闕宵冥飛策俯寒峭玉洞  
虛無人延目肆孤嘯餐霞蘊奇賞采芝企高蹈逝將物  
外蹤汗漫窮仙嶠

洪若臯

臨海人號虞鄰順治乙未進士官至按察司僉事著有天台紀游詩

日暮登赤城山宿上巖寺凌晨遊覽諸名勝

尋幽靈嶽聳縱步夕陽斜紫焰飛遙島朱光散遠閣捫  
蘿山岑律登砌石矜衍列雉千尋迴盤梯萬丈遐巍峩  
天上闕爛熳錦城霞虹影暮煙靄彤雲返照奢月明丹  
鳳彩星燦絳桃花恍惚胭脂嶺飄飄勾漏砂高低峰錯  
落上下寺參差臥佛巖龕裏迎僧竹徑叉石涎流屋脊  
崖水走簷牙禪室穿雲際仙廚入石窪松棚移淨几花  
檻煮香茶殿冷霜鐘靜房陰客夢賒櫺前清籟響嶼外  
早蜂譁曙色開軒爽晨煙入樹遮苔柔疑滑磴露濕泣

晴葩細草分沙徑疎林間日華溪光銀漢動塔影斗牛  
誇玉洞門深鎖靈泉韭長芽閒題詩滿竹入畫柳棲鴉  
拂碣堪畱目席茵聊結跏亭池無俗韻雞犬亦仙家直  
是蓬壺境何須泛月查

潘耒

赤城

不共千山疊翠看獨將秀骨憂雲寒瓊臺削出三層峻  
霞彩裝成一色丹影動天風孤塔迥門迎海日兩巖寬  
玉京只在人間世未洗中腸欲到難

仇兆鰲

赤城

名山天際望崢嶸爲御清風許上征石聳丹霄真若畫  
霞標絕壁總如城兩巖滴翠藏金闕一徑盤雲到玉京  
此地已疏塵世想好邀子晉共吹笙

張聯元

赤城山

秀削瓊瑤天半橫誰從僊窟建霞城乘風不借茅盈鶴  
已得翩翩上玉京

陳王謨

登赤城

昔讀興公賦霞標想赤城今來忘登頓神往身自輕夕  
曛映遐谷一望色殷赭丹崖與紫府恍惚來蓬瀛攀躋  
窮鳥路上下得巖阮黯淡氣象古寂歷松風鳴靜氣沁  
腸胃坐與天地清仙人何處所悠然見玉京凌霄撫孤  
塔飄飄欲遐征洗腸者誰子嗤彼俗慮盈

許君徵

賦得赤城霞起

海內名山孰天矯萬八峰頭雲縹緲又有赤城聳奇觀  
灼爍朱霞燦天表仰看萬堞峙空中日射光芒氣吐虹  
初疑錦障懸金谷還訝朱旗遶帝宮有時迅雷掃巖石

烈焰爭騰走霹靂風雨滿空金鐵鳴周郎鏖戰焚赤壁  
雨晴霞色益鮮妍蜀江錦濯掛青天仙人樓閣春雲裏  
古洞丹書彩霧邊丹書綠字真堪羨瑤草奇花開處遍  
葛洪仙竈火常明曇猷枯井光猶現霞標萬仞削芙蓉  
虎頭健筆畫難工惟有真人來紫氣登高作賦嘆猶龍

登赤城絕頂

霞標千仞插寒空絕頂登臨萬壑風西垓江流波渺渺  
東翻海氣雨濛濛飛梁影掛青天外孤塔光搖白日中  
雲洞玉書丹竈在蒼茫無路問仙翁

寄赤城源法師



支公飛錫至高臥赤霞城玉洞奇花發金庭皓月明孤  
峰懸塔影萬壑吼松聲不濯曇猷非觀心久自清  
張多藝

登赤城上巖

古洞煙霞際盤旋出半空有僧能好客引我坐臨風相  
對心爲靜高談聽不窮廚開香積飯庾信老山中

陳穎

望赤城山

仙竈丹砂湧光華薄此山風披恒紫氣雨洗自紅顏楓  
樹三秋裏桃源十里間遙天占象者渾道是函關

鄧禹錫

臨川人字若劉

登赤城

何年造化闢名山仙府南門在此間峭壁數重如玉立  
晴巒一幀似城環巖中丹鼎知難覓天半朱霞尚易攀  
更賞虛簷隨洞設何由吟嘯老雲關

張本涵

鍾祥人字靜宇

望赤城山

山容凌漢表客興逸雲端危磴非難涉丹霞正欲餐巖  
幽瑤草密雨永玉京寒欲倚蕭梁塔凝眸一遠看

釋蘊常

赤城

杖藜扶我過橋東，便覺晴嵐翠掃空。  
紫府百年藏玉簡，丹崖千丈挹仙風。  
釋籤書到新羅國，臥佛巖連舊梵宮。  
稽首尊師悲願在，我寧辛苦守詩窮。

釋明函

登赤城絕頂

獨上峰頭問碧天，長林絕壑思悠然。  
青溪霧放孤城曉，滄海雲開一塔懸。  
腸洗曇猷曾有井，丹燒抱朴是何年。  
松聲彷彿聞真誥，玉洞無須秘檢傳。

桐柏山詩

錢起

吳興人字仲文天寶十年及第授秘書郎大曆中爲翰林學士有詩集行世

桐柏

秋風過楚山山靜秋聲晚賞心無定極散步亦情遠返  
照雲竇空寒流石苔淺羽人昔已去靈跡欣方踐投策  
謝歸途世緣從此遣

白玉蟾

桐柏觀

桐柏山頭避俗囂篇章斗酒自逍遙九峰野草迷丹竈  
三井飛泉噴石橋萬頃白雲蒸綠野一聲黃鶴唳青霄  
人言華頂高高處東望蓬萊浸海潮

其二

身落天台古洞天蒲團未暖又飄然如何菴不瓊瑤地  
想是吾非桐柏仙無復得飡三井水未曾深結九峰緣  
杖頭挑月下山去空使寒猿嘯晚煙

又

澹月籠蒼松清溪蘸修竹水深蟾不沒長伴道人宿

姚鵠

咸通中台州刺史

桐柏觀

際海禮冰碧穿雲來玉清千山盤鳥道十里入猿聲草  
木飄香異雲霞引步輕誰言鰲頂上此處是蓬瀛

羅適

桐柏觀

欲訪琳宮入翠微  
滿山煙雨正梅時  
神仙事祕人難問  
造化工深世莫知  
海近應通三島信  
年多空見八分碑  
身中龍虎吞天地  
誰肯畱心繼鍊師

長吉

桐柏觀

大帝天壇渤海連  
金霞蒼壁隔塵緣  
蓬丘不斷青禽位  
仙使時來白鹿軿  
星籥豈惟壺內景  
桃花長媚洞中天  
優游笑把洪崖袂  
瞬息人間又幾年

張天雨

桐柏觀

百折丹梯杪萬松鳳笙臺殿赤城東親從海上求司馬  
寧復山中起臥龍瓊闕排空窺坐席銀橋乘月認仙踪  
真人及此東行日共說盧敖向九峰

孫

何

字漢公蔡州汝陽人舉進士第一歷官兩浙  
轉運使有集四十卷

桐柏觀

玉壇三級接秋空此是仙家第幾重羽客有時來駕鶴  
皇家無歲不投龍微吟海月生巖桂長嘯天風起澗松  
司馬先生何處去篆碑猶挂白雲封

顧碩

桐柏觀

老矣希仙訪此山山靈爲我一開顏  
雲收瓊闕來鐘磬水落梭溪嚮珮環  
擇木斷碑芳草合葛翁遺竈野花斑  
冥棲賴有殮霞侶更願相從縹緲間

貢師泰

宣城人字泰甫官至戶部尚書有玩齋集

桐柏觀

翠蛟青鳳下空同家住天台第幾峰  
歲久松肪成琥珀夜深丹氣出芙蓉  
仙童奏簡騎文虎太乙懸旗跨赤龍  
昨日從師到天上故山還著白雲封



余爽

金庭洞

九峰回合抱瓊田石藥雲英漱瀑泉聞說丹成從此路  
玉虹芝駕上青天

其二

紫府金庭大帝宮露壇蒼檜響天風上清神虎何年見  
雲錦空傳兩玉童

其三

子晉鸞飛傳帝班吹臺今在碧雲間高秋白月霜風夜  
時有笙簫赴海還

王文簡

夜宿桐柏觀

桐柏仙人久不歸一瓢秋水宿巖扉  
絕憐半夜無塵夢月滿空山鶴正飛

趙儀鳳

至治中總管台州路文敷翁然

桐柏觀

桐柏千年境穿雲試一登  
冷煙生絕壑古木掛寒藤  
丹訣無人授瓊闌過客憑  
紫芝歌一曲煮石夜敲冰

別羅沙

號桂林

桐柏

騎馬山城邑捫蘿陟雲關絕頂眺落影峻嶺多險艱天  
風起木末雜珮聲珊珊羽人忽何來見之清心顏山高  
風露冷迥若超塵寰飛流掛長虹疑落銀漢間瓊臺倚  
雙闕琪樹手可攀冥搜興未盡夕照忽在山長嘯下山  
去明月逐我還

余闕

合肥人字廷心本元唐兀氏元統癸酉進士  
官至淮南行省左丞殉節諡忠宣

桐柏

靈越此稱最隱隣表東區拔地凌丹霄鬱爲青芙蓉緣  
壁陟霞上九嶺乃周廬瓊階掩奧室赤城標外樞樓如  
空中現人若華上居不知三嶽表當復有此無畱連臥

日久非爲失歸途

徐一夔

桐柏

吾鄉之山動千數獨有桐柏非凡山孟冬之月日氣薄  
浩有老興窮躋攀峻嶺盤迴三百折日晏始陟青霞關  
芙蓉蒼翠幾千朶四面周匝如城環其中地勢坦若掌  
別是天上非人間飛樓湧墮殿灰塹煙光霞氣猶朱殷  
長松夾道狀礪柯榭葉打帽聲珊珊欲尋石碑究年代  
往往斷礫遺荆菅仙人道士出迎客羽衣蒼珮朱爲顏  
桑田滄海易變幻坐閱大劫輕人寰澗東雲房尚突兀

掃榻延我忘疲艱丹泉作酒麻作飯殷勤餉客情非慳  
忽驚風雨亂人耳及是石瀨流潺湲夜深明月出東嶺  
半照窻戶光爛熳神清氣爽不成寐直欲輕舉凌巔岼  
誰云瓊闕不可卽願我已接神霄班但愁俗骨不可換  
天明又覓征途還

吳昊

天台人字彥欽洪武庚戌舉人朔州衛知事

桐柏

平生看山愛桐柏有山如此爲名山九峰雙闕迢遞起  
秀色可掬煙霞間樓閣崔嵬迥相向桃花洞門深不關  
葛翁一住幾千歲閱此日月雙轉環鶴背笙簫振寥廓

遺音往往聞林間西厓有井數百仞丹光靈彩浮朱殷  
昨夜長松發天籟似驚遺珮聲珊珊蓬萊咫尺元易到  
獨慚踪跡迷荆菅此來暫欲須大藥服藥駐我將衰顏  
山中羽客吾宗胄相與攜我起塵寰竹房燕坐已半月  
笑歌頓覺忘憂艱手招喬盈非不好尚恐泉石緣猶慳  
芝草琅玕隔雲關小橋流水空潺湲自讀古碑視往事  
章殘字缺苔斑斑臨風徙倚獨回首但見絕壁青巔岼  
武陵從來憩漁釣曼倩自足追仙班他年雙成有消息  
吾其抱琴來往還

又

廿年不到臥龍峰今日何期有路通地擁蓬萊滄海上  
天開觀闕白雲中聽簫獨立風生樹待鶴長吟月滿空  
亦欲遠尋勾漏令大須玉札起疲癯

王明汲

桐柏

新秋露濕曉風輕桐柏宮前嶺樹平千載曾聞元鶴去  
九峰猶有白雲生瓊臺雙闕畱仙跡瑤草琪花絕俗情  
幸遇飛鳧東道主好從緱嶺學吹笙

李天秩

雲南人字止菴崇禎間台州府推官

遊桐柏和韻

霽色浮空煙霧輕  
金庭蔥蒨日華明  
風傳絳節千山動  
雲護丹丘萬壑生  
印石苔成異跡天  
開雲闕絕凡情  
自從子晉脩真後  
清夜時聞緱嶺笙

胡融

桐柏

清曉騎白鹿獨上桐柏山  
山環若城郭琪樹鬱參天  
青猿導我路如入崆峒巔  
瑞草被厓綠瓊蕊凌霜繁  
傍瞰老子宮玲瓏隱林間  
聖棟天馬出絳柱彤龍盤  
歎與冥寂士共談秋水篇  
散髮松下嘯拂霞石上眠  
贈我元玉膏相期凌紫煙



陳函輝

臨海人字木叔崇禎甲戌進士丙戌殉節著絕命詞十篇

游桐柏宮和洪九霞王遂東題壁韻

仙宮此地有遺宮古木荒煙草一叢丹竈石牀容易到  
白雲天路若爲通人歸莫問山頭鶴響落應驚澗底虹  
欲過瓊臺尋舊識吹笙半在月明中

張元聲

天台人字

過桐柏宮有感

古觀由來久深山不計年棟爲隋氏物竈白葛翁傳歷  
眺詩頻異重來意惘然帝衣風雨蝕玉座蘚苔鮮畫壁  
神龍破雕甍落日穿斷橋無復渡殘碣任橫眠茸茸平

階草萋萋遠樹鴈印隨流水逝劍沒亂雲邊惟有雙杉  
在還同兩曜寒荒庭風淅淅涼夜月娟娟羽客師何處  
山農事頗虔靈光雖兀突人世幾桑田寥落已今昨悲  
涼慨後先胡爲猶羈縛萬慮不能捐

一 胡雲客

德清舉人康熙二十一年任台州府教授

夜宿桐柏宮

不憚攀躋遠來尋桐柏宮夕陽千壑暝歸路萬山叢到  
喜元關啓呼疑帝座通欣逢高蹈士下榻白雲中

潘耒

桐柏宮

我讀坐忘論十年懷子微如何桐柏路不見綵鸞飛月  
浸丹泉冷雲埋藥草肥金庭蕭索甚清淚濕天衣

張聯元

自桐柏之瓊臺

台山上與台垣敵中有福庭開桐柏洩爲飛瀑濺珠寒  
峙爲九峰凌天碧北指玉霄神璀璨西望蓮華光的爍  
鳳笙吹下真人車龍章馳入煉師宅金漿石髓閒作餐  
芝草瑤花紛可摘滄桑一變羽人空山靈不管煙霞癖  
當年封內禁芻蕘此日山中只沙磧降真朝真歸蔓草  
黃雲白雲空陳迹仙都雖惜巨幢沉瓊臺猶喜中天闢

危崖三面削千將峭石千尋森越戟龍窠恰有雙關環  
詭異共驚巨靈壁摘星近與闔闔通藏丹迥與塵凡隔  
平生多爲名勝遊此景宇宙何從得清秋載賞明月夕  
還招雲漢青鸞翮

許君徵

登桐柏山謁夷齊像

躡屐陟危岑松陰夾蒼翠曲磴紆千盤巉巖聳無際仰  
盼層霄近俯視幽林邃飛觀白日寒晴壁清泉漬古廟  
何瑰奇鬚眉動瞻企云是首陽人靈爽於茲蒞高風杳  
難攀曠懷如可跂申莫乏椒漿褰裳慚薜荔縹緲西峰

頭猶聞雙鶴唳

登桐柏嶺

林麓鬱且脩巖磴何迢遞松風吹我襟白雲同搖曳曠  
哉千里目怡情渺無際飛泉灑空中濛濛花雨細已喜  
塵慮捐尤欣玄妙契緬想丹臺人倚仗復延睇

張

鏘鍾祥人字健亭

桐柏山

峰迴桐柏夢曾經遲日東風上翠屏危瀑千尋仍捲雪  
樵人尚說濺珠亭

其二

幽谷何曾勝蹟留空山無復煉師遊多情只有梭溪水  
猶向仙都日夜流

張利璜

天台人字

冬日過桐柏山莊

家傍青山近釣磯別開幽徑冷斜暉竹疎剩有煙添密  
梅瘦却因雪補肥巖畔鹿眠花影簇林間犬吠月光微  
桃源咫尺人間路莫悵津迷泛棹歸

過桐柏嶺下

仙窟未經斧鑿痕翠微深處有乾坤放翁佳句堪移此  
柳暗花明又一村

其二

路入瓊臺第幾重  
杳然流水白雲封  
綠蘿經雨新枝嫩  
古柏凌風翠色濃

其三

萬山迴合曉雲低  
春樹蒼茫一望迷  
欲覓落花尋曲逕  
桃源無路草淒淒

其四

嵐煙橫鎖山千疊  
苔徑斜侵水一灣  
久坐渾忘身世事  
不知何處是人間

釋宗泐

桐柏

好山好水多在大荒之東華頂秀接四明三百八十朶  
之青芙蓉丹崖瀉瀑布碧天飛白虹天柱擎天倚天立  
勢與五嶽高崢嶸金門仙子跨鸞去橋頭霞浸衣裳紅  
我欲乘雲朝帝闕順風放舟海水洌海水忽靜金雞啼  
身在蓬萊白銀闕

釋皎然

桐柏

古觀秋來秀冷然屬仙飈瓊花被脩蔓柏實滿寒條影  
殿山寂寂寥天月昭昭幽期寄仙侶習定至中宵清佩



閑步虛眞宮方宿朝

方瀛山詩

白玉蟾

方瀛山居

方瀛山上風颼颼五月六月常如秋松花落地鶴飛去  
萬頃白雲空翠浮夜半蟾蜍落丹井琪林深鎖寒煙暝  
滿天白露點蒼苔蛙市一散萬籟靜三樹兩樹啼斷猿  
樹冷棲禽夜不眠數點飛螢戀沙逕山腰石潤悲寒泉  
鐘聲隔斷華胥路不知蝴蝶飛何處摩挲兩眼摺紙衾  
人道今辰正端午曉雨初霽梅子肥龍孫脫簪新燕飛

山居蕭然無一物摘薤搗麥烹晨炊憶著往年五月四  
葛巾羽扇鸞溪市龍艘破浪槳萬枝鉦鼓聒天旗掣水  
紙錢飛起屈原祠行人往來如蟻移桐花入鬢綵繫臂  
家家禦疫折桃枝庭前綠艾製虎細切菖蒲斟綠醕  
羹鷺鱸鯉辦華筵冷浸水團包角黍今年寂寂坐空山  
山雨山風生曉寒默菴令我休意氣作詩略述山居意  
安得兩腋生飛翰與君飛上沈寥間免使在世賦辛酸  
司馬悔山詩

張聯元

司馬悔山

石髓金漿性所耽暫從桐柏別晴嵐千喬控鶴嗟相隔  
叔夜登朝謝不堪肯爲安輪忘衆妙還將捷徑笑終南  
怡情直待還山日一枕松風夢更酣

呂震

新昌人字

### 司馬悔橋

仙源妬與共故遣尺書臨素願悲芳草清風逗竹林馬  
頭方欲勒渡口却難尋寄語天台客入山須更深

許君徵

### 度悔橋憶司馬道士

桐柏棲真人高風渺千載應召赴彤庭出山行復悔至

道泯世情隱顯豈異態終南多佳境捷徑非所愛斯人  
去已久流水猶歎慨願言躡芳踪長揖謝流輩

瓊臺雙闕兩山

李白

瓊臺

龍樓鳳閣不肯住飛騰直欲天台去碧玉連環八面山  
山中亦有人行路青衣約我遊瓊臺琪木花芳九葉開  
天風飄香不點地千片萬片絕塵埃戎來正當重九後  
笑把煙霞俱抖擻明朝拂袖出紫微壁上龍蛇空自走

柳泌

瓊臺

崖壁盤空山路回  
白雲行盡見瓊臺  
洞門黯黯陰雲閉  
金闕曠曠日殿開

方干

瓊臺

積翠千層一徑開  
遙盤山腹到瓊臺  
藕花飄落巖前去  
桂子流從別洞來  
石上仙壇礙星斗  
窗邊瀑布走風雷  
縱云孤鶴無畱跡  
定恐煙蘿不放回

高似孫

瓊臺

翠嶽竦神秀玉衡直三台上有長生君含光赤城臺陽  
崖爍金芝陰壑生碧苔獨立雲在下一嘯仙俱來丹郎  
醉不醒玉女聲如孩帝鄉風自寒洞口花長開所嗟塵  
埃中那有神仙才秦皇謾東海漢武空蓬萊

清曉升瓊臺石崖有仙人腳跡

亂石掛天倚嵐壁苔痕不犯松喬跡上通羣帝集台斗  
下鑿十洲通碣石樹呼清風雜古今山道宿潤從開闢  
丹翁曾問玉女醉樵者亦見仙人奕雲飛磴道晴掩冉  
露濕衣裳香滴瀝洞中靈君來不來鶴歸衝落桃花碧

楊維禎

諸暨人字廉夫號鐵崖天曆間以進士任天台令

雙闕

巨靈霹靂手劈開雙石闕中有萬丈奇巒嶮鐵鎖高垂  
不可躡洪厓後入挾高崛引我臺端立高絕仙人跼蹐  
一一存翩若飛鴻印輕雪柏梁柏山隔吳越瓊臺不受  
東巡轍周郎紫鳳高可呼待我一聲吹鐵笛卿雲五彩  
相蔽虧琪樹精光互明滅山花山鳥自春秋天氣長清  
光日月我本三生劉阮胎三千年前我曾來仙家雞犬  
別有路金橋銀闕紅霧開人間甲子不得老瓊姬玉女  
桃花腮我今幻習都洗盡水邊山際胡麻媒尋真只尋  
盧道人虛皇座前曾相陪樂章傳下廣寒闕瓊漿互觴

流霞杯盧公已乘白鶴去林長木瓢安在哉竹溪更尋  
李八百玉棺何處生莓苔笙簫杳杳九清夜應有松頭  
雙鶴回

張鉄

黃巖人字叔平

瓊臺

振策凌台室諸天仄徑遙松梧風淅淅鈴鐸雨蕭蕭泉  
迸清泥髓芝含白玉苗麾虹度仙闕低視石梁橋

王廷表

瓊臺

青鞋不惜履青苔大壑中心異境開採藥無緣逢玉貌



尋仙有路到瓊臺旁窺截業魂爲悸俯聽潺湲雨欲來  
更望金爐真可住人間卽此是蓬萊

潘淵

天台人字默之正德丙子歲貢任馬邑知縣著有玉霄吟雙澗集

瓊臺

日暮行從華頂來白雲深處見瓊臺等閒欲跨揚州鶴  
重撥丹爐舊日灰

陳紱

天台人字文治桂林府推官

瓊臺

行到深山山益奇青松白石兩依依眼前好景道不盡  
故使遊人得句遲

陳臨民

天台人字以莊嘉靖間歲貢平和教諭著有太白吟存笥集

瓊臺

造化之理何怪哉插空幻出鬼鬼臺潤如瓊玉琢古鼎  
屹若砥柱四不連根芟日月掩其頂蛟龍蟠其隈奇勝  
本爲神所該世人豈得輕相猜葛仙翁馬道士夙有深  
緣來住此吹鐵笛彈素琴朝而升兮暮而止託身臺上  
雲濯足臺下水石牀丹竈尚依然莓苔綠遍三春雨東  
撫扶桑樹西挈崑崙丘玉簫引却鳳來遊舉頭遂可摩  
牽牛

陳雨輝

問道入瓊臺

挈伴同來訪碧宮殘碑剝落樹蒙叢  
道傍失履迷黃石車畔行歌問陸通  
林性久應儕野鹿劍心猶欲斬長虹  
出山司馬何須悔捷逕應知非此中

坐瓊臺絕頂

捫蘿偶叩古瓊宮滿逕煙雲鎖翠叢  
世外紅塵無夢到此間呼吸與天通  
千濤赴壑藏文蚪兩闕嘘霞映彩虹  
可是仙凡容易隔誰乘野鶴過山中

與之孫錫輝兩兄凌險窮臺闕之勝

欲尋深巖半畝宮其如鳥道似蠶叢  
懸崖早自驚三折

濟勝猶疑得六通絕頂何人鞭渴驥潭心有客飲流虹  
御風擬控天門翼側望天疑一線中

葉臣遇

臨海人字脩卜官郴州知州

瓊臺仙人石

金闕仙人已不回獨畱坐石傍瓊臺高崖邃壑還青壁  
暮雨朝雲長綠苔白鶴千年還自語桃花七世爲誰開  
何如雞犬同昇去不教遊人日浪猜

潘耒

瓊臺雙闕

瓊臺屹立中天孤削成亭亭不用扶靈芝根莖蒼雪膚

台山之心仙所都百神上下風雨俱積高中央削四隅  
俯瞰絕壁臨虛無雙闕巖巖夾雲衢靈溪百轉羊腸紆  
繞溪秀盡千芙蓉雲中之君朝香爐玉女鵲立羣真趨  
萬玉璀璨萬錦敷老龍守戶垂其胡靈湫百丈山腹剝  
猿驚鶴慄無來途而我闌入心膽麤高攀天梯捫天呼  
下搜雲窟餐雲腴不少畱作仙徒自顧落拓難牽拘  
仙班禮法恐不疎不如逍遙作凡夫題詩問天恕狂愚  
許君徵

夔臺

翠律萬山最高臺峙碧空金屏雙闕迥玉座九霄通翠

壁藤蘿霧丹崖松柏風飄飄明月夜笙鶴下雲中

顏允珏

瓊臺山

君不見天闕巍巍北極聳星躔都向天樞拱又不見將軍堂堂屯細柳貔貅百萬嚴刁斗天台壑中有此奇桐柏西行始得之上有繡鞍據神駿下有碧潭蟠蛟螭蒙茸歷盡蘚苔破深入瑤房不敢唾一線細接金爐峰半龕共說仙人座兩旁陡絕搖心魂千仞突兀削瑤琨直「已與帝座逼特立方知瓊臺尊端嚴磊落誰伯仲時鳴鸞鸞棲雛鳳丹鼎早傳葛孝先草廬曾結張無夢東

西嵯峩雙闕分周廬迴合攢青雲森森欲護紫宸居肅  
肅如列羽林軍長歌狂嘯胸襟拓擬問高天揮蓮鐔逝  
矣子微不可招吾生焉得層城託

陳象曦

瓊臺雙闕

造物有奇斧慘淡琢天姥壁立作雙崖金闕壯旗鼓瓊  
臺居其中錦翠相夾輔突兀插空虛目駭不敢俯神奇  
歎巨靈嶺嶂任撮土恍惚香風吹爐峰正當午萬樹燦  
奇葩明月照三五對影自徘徊飄飄欲遐舉金漿調石  
髓丹成倘我許劉阮亦空言神仙豈足侶但聞飛瀑聲

雷轟徹雲塢悠然會心遠浩氣撐腸肚萬象更何有開  
襟自栩栩會當此安居深巖結茅宇

梁文煊

奉天人字闇齋號幾汀浙東觀察使

瓊臺雙闕

台山昔未登瓊臺勞夢想及茲屹中天興欲穿雲上緣  
崖通一線嶠路惟高仰有風起颯然草木皆震蕩凜乎  
住足難心志覺惚恍險窮奇乃出橫縱地方廣四圍削  
青玉几案平如掌呼吸帝座逼尊嚴百神享突見劃雙  
峰壁立矗千丈華嶽本一山巨靈劈爲兩方輿傳異蹟  
巖巖此相仿遊屐幾曾到仙侶自來往當年蟬蛻去指



天台山志 卷一  
識氣蕭爽遄聞飄笙簫是處滿清響飛煙似可駕寧復  
顧塵壤投老思結菴丹藥契眞賞

鷓鴣山詩

許君徵

登鷓鴣山望歡溪懷徐印卿朱君吳兩隱君

我登鷓鴣山不聞鷓鴣啼但見浮雲繞樹生風搖落日  
寒淒淒北望歡山雲中現下有歡溪淨似練顧公遺跡  
已千年朱徐二子行重見二子白髮垂過耳清夜悲歌  
明月裏饑餐歡山雲渴飲歡溪水白日磊磊誰共語我  
欲從之苦淹畱鷓鴣鷓鴣我心愁

天台山全志卷十七

楚郢張聯元覺菴輯

石橋山詩

皇甫曾

人字

石梁

石梁人不到獨往更迢迢乞食山家少尋鐘野寺遙松  
門風自掃瀑布雪難消秋夜聞清梵餘音逐海潮

項

斯

字子遷江東人會昌中進士爲丹徒尉楊敬之嘗贈詩云幾度見詩詩盡好及觀標格過

於詩平生不解藏人善到處逢人說項斯後遊天台因家焉

寄石橋僧

逢師入山日道在石橋邊別後何人見秋來幾處禪溪  
中雲隔寺夜半雪添泉生有天台約知無却世緣

陶穀

新平人字秀實仕周爲學士宋興歷禮刑戶三部尚書

石梁

重重翠嶂聳雲端玉殿金樓縹緲間聖境不容凡俗到  
故將飛瀑隔塵寰

趙抃

衢州西安人字閱道官殿中侍御史號鐵面御史後拜參知政事謚清獻

石梁

曉登山閣一爐香瞻仰神僧最上方人度石橋何所畏  
如來原是世津梁

羅

適

字正之別號赤城寧海人治平三年進士任推官提點刑獄台郡前輩大雅以適爲首稱

著有易解

赤城集

石梁

飛瀑斷巖路天然石似梁始知融結日便作聖賢鄉水  
靜魚龍樂山靈草木香茶花本餘事畱跡示諸方

題石橋旃檀像

傳得旃檀相甚奇紺容光徹照須彌橋頭尊者來瞻禮  
應憶靈山聽法時

趙湘

華州人字巨源官至集賢院學士

石梁

白日巖峰峭橫橋一徑微多年無客到向晚有雲歸水  
碧苔生髮天寒樹著衣如何方廣寺千古去人稀


夏竦

石梁

斷澗橫幽石蒼苔古木陰欹危接山腹迢遞過雲心峙  
壁傍千仞飛流下萬尋秦人若驅策蓬島路非深

太史章

人字

元符元年任天台令

石梁

澗底輕雷噴玉泉石橋僧度是何年靈峰陡隔人間世  
真境潛分洞裏天施食曾聞龍就掌談禪應有虎當筵

道猷靈跡非無證誰見前腸掛木巔

洪适

江西樂平人字景伯洪忠宣皓之子與弟邁俱中博學宏詞科皓使金十五年執節不

屈歸作秦檜适亦出爲台州通判後至尚書僕射

石梁

懸磴跨幽崖奔流漱深壑宛然臥蒼龍天巧謝深鑿萬  
木斬前山笙竽真籟作長嘯斥猩猱高巢布烏鵲莓苔  
助危梁下瞰膽欲落橫前阻翠屏峭立旁如削於此判  
塵凡咫尺遂綿邈飛錫凌空虛樓臺聳林薄寶輝覲華  
燈金翰過神雀二年佐銅虎渠能解羈絡來烹紫雲腴  
寒甌散葩萼奇事訂前聞詩成謝層閣

瀑布

芝田環拱碧崔嵬  
流瀑高從天際來  
飛沫有風長是雪  
寒聲無日不如雷  
巖前八桂何人折  
溪畔千桃露未開  
便覺仙都清晝永  
翻愁歸路染黃埃

高似孫

石梁

一石上負崑崙柱  
一石西奔牛女渚  
玉幹猗鱗萬古松  
夜夜神光千帝宇  
石滑苔危水一縷  
四海長沾開闢雨  
月落未落步行矩  
兩足敲泉龍擺舞

賀允中

字子忱上蔡人參知政事紹興初寓居萬年寺西後徙臨海

石梁

敢祈方廣現危梁  
千古燈燈共此光  
聊試茶花便歸去  
杖頭挑得晚風涼

王十朋

石梁

路隔仙凡信已通天  
公容我踏長虹情知方廣神遊久  
不在登臨杖履中

余 爽

石梁

雲藏鐘鼓霧藏林  
龍護山花雀散金  
知道有人橋外住



青崖遮斷不教尋

瀑布

九峰回合抱瓊田  
石蕊雲英漱瀑泉  
聞說丹成從此路  
玉虹芝駕上青天

宋之瑞

石梁

石梁橫亘不知春  
閱盡憧憧幾許人  
正使更無蒸餅礙  
可能前路絕荆榛  
應緣心在已心空  
方廣那知只此中  
金雀茗花時現滅  
不妨遊戲小神通

葉清臣

長洲人字道卿天聖間進士累官侍讀學士

石橋

一徑涼飈響萬松青霞紫霧祕爐峰寒生別洞前溪雨  
聲到諸天午夜鐘仙境月高猶駕鶴陰潭雲起舊降龍  
出塵境界無多地已上金庭第七重

趙汝愚

字子直擢進士第一淳熙間以奉議郎知台  
州光宗時拜右丞相

石梁

法身遍滿三千界影現天台水石間我欲直從心地見  
未看磊塊聽淙潺

魏宗

人字

石梁

閒入招提景疊華積翠雲晴光朝更合嵐氣晚來分梵  
語微茫韻鐘聲杳靄聞無由問禪法坐對拍爐薰

王亞夫

人字

石梁和韻

天巧何年路千峰亂入雲瀑飛雙澗合嵯斷一橋分樹  
色春猶凍猿聲夜或聞靈蹤如可見煮茗共爐薰

趙清源

人字

石梁

何處覓靈蹤天台第一峰雲深惟見寺夜靜忽聞鐘卓

錫隨飛鶴談元起，蟄龍石橋如有約。跨月坐從容，

賈似道

台州人字師憲平章政事

石梁

古路行終日，僧房出翠微。瀑爲煎茗水，雲作坐禪衣。尊者難相遇，遊人又獨歸。一猿橋外急，便是不忘機。

彭夢祖

人字

石梁

石磴盤空別島開，深林蒼翠拂衣來。曇華映日千峰繞，飛瀑凌風萬壑哀。野寺無人猿自嘯，危梁駭客鶴頻回。桃源洞杳知何處，翠髻雲房亦浪猜。

曹文晦

石橋

山北山南盡白雲雲中有水接天津兩龍爭壑那知夜  
一石橫空不度人潭底怒雷生雨雹松頭飛霧濕衣巾  
曇華亭上茶初試一滴曹溪恐未真

杜寧

黃巖人字宗謚宣德丁未榜眼官至兵部侍郎著有樂全集

石梁

鬼斧何年鑿蒼虬跨斷山濤喧三峽底僧梵半空間勝  
跡探希見塵心愜暫閒危崖憑獨久竚望不能還

范理

石梁

萬疊雲山紫翠重微微一帶路遙通忽聞鐘磬穿雲出  
漸見樓臺隱霧中瀑向巖前飛玉屑人於天上踏銀虹  
此身卽是登方廣變幻何須更遠窮

謝鐸

石梁

石梁聞道十分奇又向巉嶁一繫思興盡也須重載酒  
官忙誰許費吟詩衣添短袂風初冷天覺輕陰日未遲  
竹院到時須宿山靈休問我何之

楊澤

天台人字商霖成化壬辰進士官至河南按察使

石橋

乘興探奇到石橋古碑拂蘚認先朝  
八峰羅擁晴虹臥雙澗飛流凍雪飄  
方廣寺鐘聞縹緲曇華亭路望岩嵯  
振衣便覺輕塵世直上洞天不憚勞

王 壙

石梁

石梁高架入雲霓橋下奔泉撼翠微  
噴雪乍疑銀漢潰橫空驚見玉龍飛  
匡廬莫謾論兄弟烏鵲從來有是非  
笑我平生愛奇勝臨深傍險夜忘歸

鄭善夫

石梁

陰厓豁衍氣溟濛山木慘切悲回風石梁駕天蟠彩虹  
飛流下擣龍光宮上仙之都弱水東彼岸可度天之功  
十年尋仙志未已台嶽欣逢羨門子願君啓我元命秘  
荷鑱拾茅吾不恥桃源洞天春色多爾時劉阮今如何

陳長卿

人字

石梁

扶筇掇寒煙經度羅漢嶺扳援出藤蘿石梯遶天頂翼  
然忽見曇華亭人言此是仙人境五百應真今在否圓  
光夜吐如暎浮一聲金策振林杪松月驚墮千山秋忽



然澎湃瀑聲急石橋架壑蒼虹濕我生矯健筋骨輕飛  
蟻直上峰頭立兩三客子俱膽驚下視縮瑟不敢行絕  
憐老蛟織水底鱗屋夜湧還顛傾上有玉女泣清露山  
靈麾呵常守護紺宇杳何處忽聞疎鐘聲琪林珠樹輝  
相映寶地交錯黃金繩欲訪瞿曇談至道回首目見慈  
雲遶

葉良佩

太平人字

嘉靖癸未進士官刑部主事

由石梁尋萬年寺

石橋西去逢僧梵華頂浮來玉井蓮雙澗風泉迴鶴鶴  
八峰晴色動雲煙避喧且欲依蘭若渡海誰能駕鐵船

歷歷松杉如昔夢始知遊覽是前緣

石簡

寧海人字襄伯嘉靖癸未進士官至都御史

石梁

愛爾真奇絕神遊今幾春飛虬橫碧落奔漢斷紅塵古  
往千年恨霞棲百慮嗔中天纔尺五何處問天津

魯昇

人字

石梁

勝境依然在人間歲月遙誰知三十載重上石梁橋古  
路紆應熟前僧跡漸消斯遊如到再深處覓王喬

嚴光治

人字

冒雨披山磴梯雲到石橋水聲鳴不盡人跡去還遙落  
日浮虹影冲牛射斗標飛鳧何處覓惆悵憶王喬

夏曷

人字

遊石橋次宗成姪韻

多年聞勝槩此日一躋攀梵宇煙霞裏鐘聲杳靄間橋  
危過客少花落定僧閒撫景清吟久乘驄帶月還

許載

人字

石橋

笑指千山小吟穿一徑微野花迎畫戟嵐翠濕緋衣橋  
險無人渡林深有路歸去尋方廣寺次第問元機

諸葛義

石梁憩曇華亭

昔年曾讀興公賦彷彿空中飛瀑布再讀青蓮天姥吟  
夢游已識天台路上下肩輿歷翠微孤亭高出雲邊樹  
石梁天矯橫紫煙中有噴薄飛來泉六龍挾雨出銀漢  
雷聲下擣千尺淵冷風吹雪紺花舞珠林瑤草相新鮮  
方廣精藍久靈闕應真五百何茫昧但聞石罅金磬聲  
隱隱長空流梵唄仙家幻跡宵莫窮顯現神通寄遊戲  
日落空山片月孤恍然濯魄在冰壺葛巾箕踞雲根石  
欲倩長康寫作圖

孔天蔭

石梁

神嶺劃如關亘古綿一梁虹衢玉京路煙道羽人鄉迸  
水藏金澗懸蘿暗紫房尚遲飄錫杖臨眺佇斜陽

黃

綰

黃巖人字

由恩蔭官至禮部尚書

石梁

天台四萬八千丈足躡飛霞五百年秋日天風散冥靄  
金河照眼石梁懸

王廷幹

石梁

遊人夢想天台勝盛夏攀臨海日邊雙闕梁空橫白石  
千年瀑布射飛泉謾欣衣帶浮靈雨遙望雲霄散綺煙  
卽此層城清世網何勞閬苑訪神仙

陳堯

通州人字嘉靖二十一年任台州府廉敏寬仁去後人愈思之官至刑部侍郎

### 石梁

迴合千山松桂林桃花落盡溪水深石梁採藥何由得  
羨爾幽人出世心

### 其二

仙子雲山空隱淪紫霞黃■憶風神龍湫六月常霏雪  
龜脊千年不度人

王士性

宿石梁

獨跨幽崕劃鬼工何來神物蛻崆峒轉疑白日填烏鵲  
忽謾青天駕彩虹飛瀑倒垂雙澗合驚濤怒起萬山空  
西樓月色終宵在風雨無端滿梵宮

王立程

人字伯度萬曆辛卯舉人鉅鹿教諭

錢塘葛居士重脩曇華亭

鴿嶺開神跡龍宮隱梵天建標霞五色鞭石乳千年飛  
瀑橋常在聞鐘寺不傳未能驂鶴駕何處禮金仙壁古  
摩青蘚巖欹宿紫煙尋源如捕影得趣每忘筌自有高

人賞欣逢長者緣買山惟蠟屐布地有金錢轉覺浮生  
幻深知道念堅旃檀施未足舍利果將圓願以優曇鉢  
賡爲桂樹篇應真知五百化劫已三千太白峰頭月曇  
猷井下泉與君深結侶搔首意茫然

韓敬

歸安人字求仲

石梁觀瀑

到此都忘言作想向空際單詞落擬議徒爲太虛滓霓  
亦不敢吸虬亦不敢逝擊撞穿鴻濛濺沫皆玉戲我欲  
箋天上特煩五丁寘拔取明星臺移植蓉城薺上沃我  
脣雪下通風穴氣鮫人日輪織廣結霞天珮却呼紫霄



翁坐邀赤鬚吏躡蹻蒼茫間千里鞭渴驥

薛三省

遊天台至石梁

捫蘿攀薜徧高岑還道天台路可尋方廣寺前飛瀑隔  
石梁坡岸白雲深

王思任

石梁觀瀑

誰將一疋縑經緯萬里雪上有織機梁提絲不聽歇天  
襄無此巧火浣無此潔文是觀音蓮花花噴玉屑

其二

振衣千仞岡請君騰一尺濯足萬里流請君展半席神  
龍門下雷白馬江中沙人人看石梁人心不如石

張文郁

天台人字太素天啓  
著有度子亭集

進士官工部侍郎

### 石梁

吾鄉山水競尋幽碧樹丹溪曲曲流繡壁直飛清響落  
銀河倒掛白雲浮勢如走壑憑誰挽筆少懸河不易酬  
天樂恍然飄隔水冷冷身世似浮漚

陳函輝

### 將至石梁

未記生前事惟餘夢後身山光生袍袖瀑響落蹄輪不

語看雲靜重來覺路新殘碑何處寫畱地篆閒人

予四過石梁矣援筆紀之

家去石梁九十里半生幾兩屐相尋一丘一壑自謂過  
入山入林豈厭深再來拾得應呼伴前度劉郎可賞音  
簡點紅塵思白社莫教短髮始抽簪

李光霏

人字

石梁

石虹穿斷峽怒吸雪濤飛徑仄千巖隱潭空萬壑歸野  
風飄薜月花雨濺苔磯洗鉢僧回晚寒光澹夕暉

柯夏卿

黃巖人號玉笥崇禎丁丑進士官天津兵備  
參政著有忍冬軒集

天台入石梁道上

萬壑奔流一磴迴，陡於窮際見崔嵬。  
縋蘿鬪石僧爲帥，傍岸尋花杖作媒。  
睨眄數聲蒼樹裏，琅玕半幅白雲隈。  
憑誰譜入奚囊去，賸有清音拂指來。

何絃度

石橋觀瀑

靈虹渴飲跨丹丘，玉館金庭異跡留。  
地轉星河能不夜，天開霜雪欲長秋。  
半空花散三千界，一片瓊飛十二樓。  
揮手風塵邈城市，人間何處更滄洲。

蔣超

金壇人字虎臣，明台州推官蔣鳴玉子。

石梁

嶺岡矗地紫翠篠簞天碧驚湍割煙界棧路接雲驛危  
橋鬼落成突兀見龍脊飛泉翻素幃雪箭射猊肋初驚  
虹萬丈旋覺玉千尺天瓢恣潏盎銀甕盡傾泄對吾隔  
雷吼久立怯靈魄似此發越盡還爲真宰惜悠悠此意  
深惆悵度晨夕

潘璋

石梁

曲磴窮幽絕穿雲到石梁巖飛千尺雪木落九秋霜鐘  
韻松間出泉聲磻底長徘徊看不盡萬壑映斜陽

施潤章

石梁觀瀑

飛來橫絕壁天路出雲端  
澗合雙崖鬪山鳴十里寒  
蟄龍時起舞仙姥坐盤桓  
此徑終安往孤亭盡日看

潘耒

石梁觀瀑布宿方廣寺

豈必瀟腸訪化城巖邊古寺最幽清  
僧於紺髮光中坐客在銀虹頂上行  
不夏松杉含雨氣無眠樓閣撼濤聲  
應真畱我遙招手一墮紅塵便隔生

其二

五百仙人果位尊  
驅來鬼斧鑿無痕  
山根裂到巖頭合  
天上疏從地底翻  
萬壑冰綃懸迴軸  
千羣浴鐵走和門  
斷鼇何事畱餘怒  
終古風雷白晝昏

鮑復泰

人字匯亭康熙四十七年知台州府

石橋

聞道台山幾欲遊  
今朝何幸到林丘  
石同臥虎天生險  
水似遊龍地更幽  
夜靜金鐘聲細細  
月明梵語韻悠悠  
何時得作煙霞客  
竹笠芒鞋自在求

汪澐

石梁觀瀑紀勝

靈斧誰將石壁開  
瑤虹垂處訝奔雷  
明珠萬斛從天落  
素練千尋動地來  
龍偃巉巖驚客渡  
鶴飛窅冥帶雲迴  
曇華高閣重凝望  
一片霞光映上台

張聯元

石梁

蓋竹當年曾入夢  
曇華此日喜相過  
亭臨絕澗仙蹤近  
玉削懸崖鬼斧多  
白練雲中分翠嶂  
彩虹天際鎖銀河  
靜觀不覺塵機息  
自古簪纓讓薜蘿

石梁道中

名山難髣髴  
佳氣實絢繡  
石磴重重畫  
松風處處聞  
有



峰皆疊玉無徑不勾雲應與曇華近尋幽興輒羣

陳王謨

石梁

深溪曲澗欲爭流一束天教截上游龍怒觸山噴白雪  
雷驚動地撼丹丘聲喧終古無停日心靜常時在素秋  
飛瀑天台行處有探奇自愛石梁幽

又絕句

兒戲天工置石梁故將急湍鎖中央熊咆虎吼千年恨  
噴雪跳珠十里長

任晟

字濟川湖廣黃岡人

遊石梁宿方廣寺

誰畏尋仙道阻脩直從靈境挹浮丘綵虹橫鎖疑瑤島  
一瀑高懸下玉樓月影欲留幽客住松濤共捲碧峰秋  
眼前蒸餅終無礙信宿禪扉真勝遊

朱潮

人字

再至石梁

幽亭又喜一棲遲飛瀑看看勝昔時芒履不辭仙窟遠  
塵寰誰似石梁奇境藏絕壑難重到天許名山結故知  
安得永居方廣畔相尋妙侶採青芝

張鏞

遊石梁宿方廣寺

奇峰蒼翠鎖危亭，雙澗淙潺匯福庭。  
雪練千尋驚碧落，冰綃一幅下青冥。  
芒鞋頻爲遊山換，客夢甘從聽瀑醒。  
一宿精廬興未了，春風秋月擬重經。

許君徵

石梁

蜿蜒玉龍驕，憑空架彩橋。  
兩山雲霧合，千仞雪冰飄。  
響落龍鼉吼，光翻日月搖。  
凌風仙骨在，飛渡赤城標。

馮永年

石梁

雙澗齊流瀉石屏屏前片石幻龍形澗穿地去驚三峽  
石向天懸鑿五丁方廣寺藏僧已隱曇猷井在葑還青  
奇踪儘日看難厭重借風泉枕上聽

馮尹年

臨海人字

石梁

奇絕危梁亘碧空泉聲雙派幾時窮千尋雪浪翻銀海  
萬壑風濤響貝宮神女戲珠飛作雨仙人鞭石化爲虹  
孤亭坐久生岑寂劇勝東坡夢裏逢

釋見公

石橋

金枝玉樹爛雲虹五百僧伽化境通變現有身分刹土  
去來無跡住虛空鹿啣花繞文殊座龍戲珠迎海伯宮  
曾見石橋行道處卽蓮香散吉祥風

釋訥齋

石梁

疊嶂層巒護石橋橋西樓閣接神霄有時龍見作雲雨  
或聽梵音同海潮翠木蒼藤分掩映丹崖白壁聳嵒崿  
我來登覽絕塵事啼鳥一聲山路遙

釋遵式

瀑布

古觀濬山下尋幽似有期  
瀑清宜坐次峰好獨歸遲  
客嘯巢禽識仙踪藥叟知  
我來無別趣禪性儘相宜

釋源芹

石梁紀勝

誅茆卜得近幽崖  
愛看飛泉不計回  
午倦撫松吟白雪  
暮閒趺石聽寒雷  
春深翠嶂如屏列  
秋老楓林似錦堆  
飯罷禪餘無別事  
扶筇終日興徘徊

斷橋山詩

五立程

斷橋

駕海長濤捲雪寒天門一道下驚湍冰絲晴織支機石  
玉屑煙霏承露盤靈斧參差神鬼幻仙源咫尺水雲寬  
豪梁想泡影乾坤欲渡難

朱輅

人字

斷橋

可有人能到將無鬼自輸米從溪上渡全賴竹枝扶  
石排天維深淵鑿地孟劃然中裂處敲斷石梁圖

潘耒

斷橋

石梁奇共見人到斷橋稀澗路宜春雪山糧一尺薇泉

穿仙掌落石捲渴虹飛凝綠潭無底沉沉玉漏微

顏允珏

斷橋

沿澗何辭仄徑遙峻嶒天險疊瓊瑤空山捲雪驚芒屨  
危磴飛湍駭碧霄洗耳也應凡骨換結廬豈乏羽人招  
客遊止賞曇華瀑誰共探奇到斷橋

寒石山詩

寒山子

山居

可愛寒山道而無車馬蹤聯溪難紀曲疊嶂不知重泣



露千般草吟風一樣松此時幽徑處形問影何從

其二

獨臥重巖下蒸雲晝不消室中雖翦髮心裏絕喧囂夢  
去遊金闕魂歸度石橋排除閑我者歷歷樹閒瓢

其三

自樂平生道煙蘿石洞間野情多放曠長伴白雲閒有  
路不通世無心孰可攀石牀孤夜坐圓月出寒山

其四

欲得安身處寒山可長保微風吹幽松近聽聲逾好下  
有斑白人喃喃讀黃老十年歸不得忘却來時道

其五

寒山多幽奇登者皆恒懾月照水澄澄風吹草獵獵周  
梅雪作花杙木雲克葉觸雨轉鮮靈非晴不可涉

陸放翁游改正寒山子詩書有人兮山陁雲卷兮霞  
纓乘芳兮欲寄路漫兮難征心惆悵兮狐疑蹇獨立  
兮忠貞此寒山子所作楚辭也今亦在集中妄人竄  
改至不可讀今改正寄天封明公或以刻之山中也

朱文公亦有字寄國  
清南公索寒山子詩

郭三益

人字

元祐間仙居令

寒巖

道人棲碧山雲歸在空曲十年海潮音外物緣已熟時  
攜貝葉書步入深林讀宵眠護禪虎晝引穿花鹿卷中  
三昧語藥我貪噴毒何當脫雙履杖藜追高躅

太史章

題晏坐石

白雲曾罩定中身石上歸雲不見人應有山神長守護  
松風時爲掃埃塵

洪适

寒巖

載驅殘月路信宿暮雲端衣被松風濕樓臺石氣寒道

心長慕遠山勢似歸盤相對無言盡青燈惜夜闌

曹一介

天台人字筠軒著有友竹稿

晚過寒巖

草樹含秋淨寒山看晚過日光畱半壁泉響落深蘿野  
路門前改僧房雲裏多十年無廢事塵劫更如何

楊澤

寒巖

五宿寒巖寺秋深木葉飄泉聲來樹杪暝色隔雲霄洞  
日畱龜石天邊駕鵲橋丹如成柏轉何必問王喬

黃綰

寒巖

長憶寒山隱今朝訪爾登白雲猶抱石青壁自垂藤洞  
闔苔痕上天垂雨氣騰卽看塵世遠彷彿我來曾

明巖山詩

寒山子

明巖

重巖我卜居鳥道絕人跡庭際何所有白雲抱幽石住  
茲凡幾年屢見春冬易寄語鐘鼎家虛名定何益  
登陟寒山道寒山路不窮溪長石磊磊澗曲草濛濛苔  
滑非關雨松鳴不假風誰能超此慮共坐白雲中

太史章

題幽石

瘦疑神所鑿不與衆巖俱鎮地形何直參天勢自孤鶴  
棲喬木穩猿攬古藤粗欲得丹青手和雲畫作圖

洪适

明巖

路轉標霞外雲間緩帶前幾層山裏屋一線竹中泉洞  
口石孤聳巖頭峰倒懸故應風雨際行子總回鞭

許嗣

天台人字繼可號得靜山人

明巖

昔人已去經幾年空畱遺跡青山傳巖前幽石巖下屋  
飛索百丈流玉泉泉聲瀟瀟瀉蒼雨雖有白日無青天  
試登絕壑窮遠討石門天柱相勾連空壁玲瓏隱虛籟  
懸崖一擊雷轟然昔嘗愛慕如饑渴我今偶客畱潢川  
春風啼鳥二三月白花翠竹爭新鮮杖雲履石走不息  
濕蘿無路難攀緣八寸關前一長眺黃猿啼落青松煙  
許廣大 嗣子字具瞻元統間進士

明巖

幽尋入藤蘿谷轉樵徑小夕陽度遠岑鐘聲出林杪陰  
風吹虛壑招提極深窅中有茹芝人冥搜事幽討揮手

謝時人高蹈羣峰表石牀思舊遊春林忽啼鳥夜來山  
雨多岩巉落清曉

施文德

人字

寒明兩巖歌

昨日遊石梁謂盡天台奇今朝遊兩巖奇復不減之明  
巖迴合天中起兩崖巉削東西峙漠漠惟開八寸關  
蓂時應雙行履巖下千尋瀑布懸巖中神井出甘泉  
飛泉點點灑寒雨石溜片片生輕煙沿崖暗歷尋仙  
路間丘馬跡仍如故松桂高盤石鼎雲獅象行窺仙  
掌露響洞玲瓏勢若傾石屑陰深行者驚忽有一隙  
開天日峭



壁嶮巖殊怪形出洞逶迤不數里捫蘿復入寒巖裏寒  
巖之景更何如幽勝不能分彼此悄然石洞隔紅塵飛  
巖若墜接蒼旻上竅哈呀藏燕蝠下坂寬平容萬人仙  
人座下紺園開疊嶂層巒繞梵臺丹房蔽日金爲地球  
樹連雲翠作堆奇跡異境皆經過目中應接誠不暇各  
道窮幽性所耽相與徘徊不知夜夜來寄宿巖中央  
林忽上明月光道人疑是寒山子望而不見意茫茫茫  
茫久燒燈共盡今宵酒酒酣爲作兩巖歌明  
朝馬上空回首

陳 袞

人字

成化間天台令

明巖

平生性僻好山遊  
石磴躋攀最上頭  
香氣盡隨花雨到  
炎威端爲竹風收  
丹崖透逼青霄聳  
綠樹陰連紫殿浮  
極目南天親舍遠  
又教回首望神州

許爵

九日遊水竹莊登明巖

十里名山水竹西  
插花呼酒古招提  
醉來欲問閭丘子  
峭壁無緣著馬蹄

盧溶

明巖

天地藏無盡神仙事有憑  
泉空寒玉濺洞古白雲凝  
薦屐須瑤草緣崖看異藤  
閭丘焉得暇正馬觸峻嶒

陳楷

人字

明巖

幽石連寒巖兩山自依負  
嶠崖脈絡通景象交綴補奇  
巧天造成巨靈闢深塢對峙  
石作門雄鼎類蹲虎有洞  
名響巖投石如擊鼓巖下湧  
醴泉澄清徹元圃掬飲通  
仙靈伏龍吐鐘乳高枝月篩  
陰夾道雙桂古入洞登瑤  
臺雲光透窗戶朝陽石座隅  
全宰棲真堵巖竅紅日穿  
窿穹僅隙睹合掌懸兩峰倒  
作擎天柱西探八寸關盤

桓石品聚三仙笑詠時碧月光瓊宇潤瀑水索垂蔽崖  
灑靈雨我來醉欲醒連吸潤腸腑羣黎一體分饑渴同  
焦苦唾化爲甘霖及時澤施溥

潘耒

明巖

蟄龍蟠處不容窺苦被松門散聖知天與石龕裁合掌  
神供玉筍只單枝壁開削鐵看天小洞轉旋螺得月遲  
把斷重關無路入惟餘水索透空垂

王道

武城人字純甫正德間進士官吏部右侍郎  
贈禮部尚書謚文宣有順渠文錄

明巖

自古懸崖深蔽日此心圓鏡本無塵  
會知明暗非關石便是巖中得道人

天柱山詩

羅適

天柱山

孤峰插太清天柱此垂名造化功成後乾坤賴不傾  
夜星千拱小秋漢一梁橫欲問登臨處重梯四面生

東橫山詩

許渾

東橫山

孤舟路漸賒時見碧桃花溪雨灘聲急巖風樹勢斜  
猿垂弱蔓鶴鶴宿橫槎謾向山林宿無人識阮家

顏邁

東橫山

遲遲芳日興高騫况指藤蘿翠可捫絕頂田疇堪種藥  
丹丘雞犬別成村怡神野塢桃千樹放眼青山酒一尊  
醉後呼茶試活火巖間喜有石泉存

楊珂

人字

新婦巖

新婦誰名赤石精玉容高映碧霞城年年化作千峰雨

流落寒溪不盡聲

寶華山詩

張聯元

詠花乳石

客未登雲頂山先問寶華何來仙府石疑剪赤城霞鑿  
枕通幽夢鏤杯罩碧紗賞奇堪把玩已勝玉無瑕

蒼山詩

潘耒

蒼山九龍潭

芸芸天地間萬族皆可見龍胡獨幽潛出入以雷電幸

存所居潭蹤跡差可辨茲山靈奧區羣龍久分擅或晦  
若甕井或明若庭院或爲蜂房懸或作螺角旋側掛藤  
橫梁奔衝瀑垂練團團聚荷珠煜煜開鏡面潔不著落  
葉清或浮花片如耽谷臥幽似鄙天行賤巖欹路千盤  
壁窄天一線晴空蓄風雷盛夏含冰霰裂石畱爪痕噓  
涎結香片想當開闢初龍德存海甸疏封此名山聽擇  
形勢便長攜族屬居不作元黃戰有龍山則靈雲樹常  
蔥蒨下方苦旱暘精虔此禱奠如絲一縷雲霖雨千村  
徧我來敢褻睨良用窮神變一嘯沸圓波恍惚鱗鬣現

王愛山詩



馮鼎年

過玉愛山

緣崖溪詰曲陟嶺石谿  
隔塢聞人語深林住幾家  
不知有魏晉得且樂桑麻  
就問桃源路荒荒日欲斜

金庭山詩

盧天驥

人字

金庭山

嵩高秀入洛川晴鶴去雲歸冷玉笙  
霜白金庭今夜月  
流風依約有遺聲

許岳英

人字

金庭山

金庭之山幾千尺上薄穹窿象緯逼雲溶霞剗陰液升  
造化鍾靈神所惜天台鴈蕩相鈎連天吳屏翳精英騫  
危崖颺颺識動石律令擊搏江濤喧元精夜降淨霞穢  
河鼓鏗鉤徹幽祕踉蹌百怪歸杳冥仙跡丹房最奇麗  
右軍之居竟渺茫千年遺跡爲仙鄉吹笙子晉不知向  
浮丘羽化緱山陽螾珠脫殼影搖扚疑是丹光照虛室  
崖間薜荔五色縈澗底石泉清夜泣望美人兮竚青宮  
翠睂丹臉世罕逢握瑾攜瑜人孰與猿鶴侶時相從  
翩然被髮步虛曠聽得瑤華氣清壯暮歸不知山月高

撼郭潮聲動虛幌

周汝登

嵯縣人字繼元萬曆間進士官雲南參政有海門先生文錄

遊金庭山

千年古洞鎖蒼苔洞口遊人自去來  
赤水池邊瑤草淨香爐峰畔野花開  
吹笙竹裏聲疑在跨鶴雲中客未歸  
試看樽前今夜月當年曾照讀書臺

黃璧

人字

遊金庭山

久慕金庭作勝遊今來素志已全酬  
路通洞口那能住水繞靈湫不斷流  
爐鼎香凝煙樹晚劍峰斜倚碧天秋

興來長嘯出門去回首乾坤無盡頭

許君徵

登金庭

登金庭兮山崔巍長松落落兮覆青苔拂白石兮獨坐  
聽流泉兮巖之隈風泠泠兮入袂雲澹澹兮飛來鳥和  
鳴兮自樂花含笑兮爭開彈清琴兮數闋孤鶴當空而  
徘徊懷子微兮步瑤闕招子晉兮登仙臺呼葛洪兮問  
丹訣拉浮丘兮遨蓬萊餐流霞兮吸沆瀣披雲霧兮履  
瓊瑰視六合兮若咫尺滄海兮如杯馭虬龍兮遍九天  
而遐攬更千秋萬禩兮神光熒熒而弗衰

天姥山詩

李白

天姥山

海客談瀛洲煙濤微茫信難求越人語天姥雲霓明滅  
或可覩天姥連天向天橫勢拔五嶽掩赤城天台四萬  
八千丈對此欲倒東南傾我欲因之夢吳越一夜飛度  
鏡湖月湖月照我影送我至剡溪謝公宿處今尚在綠  
水蕩漾清猿啼腳著謝公屐身登青雲梯半壁見海日  
空中聞天雞千巖萬轉路不定迷花倚石忽已暝熊咆  
龍吟啓巖泉慄深林兮驚層巔雲冉冉兮欲雨澹澹

今生煙列缺霹靂丘巒崩摧洞天石扇訇然中開青冥  
浩蕩不見底日月照耀金銀臺霓爲裳兮風爲馬雲  
君兮紛紛而來下神鼓瑟兮鸞回車仙之人兮列如麻  
忽魂悸以魄動恍驚起而長嗟惟覺時之枕席失向來  
之煙霞世間行樂亦如此古來萬事東流水別君去矣  
何時還且放白鹿青崖間待賓郎騎訪名山安能摧眉  
折腰事權貴使我不得開心顏

呂不用

新昌人字則行洪武中辟授本學訓導著有  
得月橐牧坡橐

天姥山追和李謫仙吟

支郎遯沃洲江州司馬記中來歸帆拂天姥杜陵野老

詩中覩萬山從此空縱橫截天拔曲東南城勢如周王  
坐鎬京臣妾億兆心皆傾太白平生慕東越夢裏分明  
招日月上山日在山渡溪月在溪山靈爲白道其路山  
鬼不敢當前啼列宿手可摘天街足可梯山頭見抱犢  
雲中看養雞或行或息興靡定倏而朝兮倏而暝銀潢  
萬丈飛來泉玉虹挂在丹厓巔採黃精以沾露尋紫芝  
以踏煙子喬旣朽赤松亦摧王母老死蟠桃不開金銀  
之氣固自有何所得置仙人臺膏吾車兮秣吾馬御風  
坐我兮天姥下鳴雞啞啞雜紡車山人戶戶皆桑麻謫  
仙乃狂客一夢千載令人嗟昔高唐之想像卽天姥之

雲霞古來好事多若此茫茫總是江河水東魯諸公望  
汝還三百酒杯一日間却笑夢中吟好山嗚呼峩睂亭  
前秋水色使我空憶公容顏

顏邁

遊天姥山

石城之東山蒼蒼太白曾向臥秋霜予亦有心老仙塢  
青鞋布襪指天姥褊地直插青天高蓮華肯與羣峰伍  
此身不許世網縛兩足豈爲游山弱風清已撲面上塵  
雲空如刮眼中膜搔首狂吟謝眺詩拂石遠招支遁鶴  
勢如鳳舞共鸞翔造化欲孕天台山蓬萊清淺尚可卽



况乃咫尺仙都間應真同度石梁窄王喬共上瓊樓寒  
振衣從此尋金丹爲我換骨還童顏

七言排律

陳學說

人字

天姥寺吟

無求無欲飽春風杖履逍遙眺遠空黛抹芙蓉翠欲滴  
秀擎金掌削疑工上方初月千峰紫下界斜陽萬壑烘  
松括寒濤呼虎豹石壇蒼蘚繡仙翁每尋寶籙青羊見  
獲采瓊芝碧霧籠鴈汩巒迴雲懶度猿崖壁立逕難通  
天邊海束盤如帶麓腳雷低吼若蝨不必岱宗捫日觀

却來姥頂較華嵩昔年夢筆摧轟電此際豪吟落彩虹  
路入半山雞犬靜那知身在白雲中

唐覺世

人字華樂知新昌縣

望天姥山

頗憶扶身須藥物未因乘興訪仙踪人間拙宦應推我  
宇內名山恰在封面面陽坡栽白朮層層複嶺長青松  
歸途更喜依天姥指顧煙雲百萬重

陳濤

人字

度天姥山

懸崖峭石一重重行處飛泉響亂松怪底肩輿難得到

白雲遮斷兩三峰

其二

薜蘿遶徑寺門虛老樹年年劫火餘閒坐小亭看山色  
不知嵐翠濕衣裾

許君徵

太白夢遊天姥歌

峩峩天姥峰去天惟咫尺蒼崖翠岫列青霄半空煙雨  
時浙歷自非仙骨玉鱗鮪誰能攀蘿凌絕壁曠哉西蜀  
謫仙人一夜飛渡鏡湖春手把綠玉杖頭戴紫霞巾騰  
身直上天姥東天雞縹緲啼雲中仙童列無數騎蒼螭

兮駕赤龍授以長生之寶訣餐以崑崙之紺雪丹書綠  
字非人間願與仙真長往還誰知枕畔煙霞失至今惟  
有哀猿號深山

其二

誰云天地寬名山只在枕中看誰云日月久古往今來  
一回首吁嗟太白千載豪詩吟百篇酒一斗當其夢遊  
天姥時飄飄一似神仙偶若非四明有狂客誰知詩泣  
鬼神堪不朽我亦時登天姥峰高吟直與帝座通金龜  
不見換酒人至今淪落臥山中請憑一夢叩天闕白也  
何才臣何拙願授臣以五色生花之綵毫遍題宇內名

山水不獨天姥古今擅奇絕

登天姥峰招太白

太白千載豪神遊八極表俯視塵世榮渺若一葉小夢  
登天姥遊風期何縹緲我來此山中攝衣萬仞峰層巒  
去天不盈尺呼吸直與帝座通狂呼摘仙不可見但見  
浮雲萬里生悲風

沃洲山詩

何鑑

人字

遊沃洲山

沃洲山勢連天姥放鶴鷺鼻峰相伍千巖萬壑總煙霞

到今只說支遁塢昔人隱逸非知各屠肆魚鹽倒置  
莫道緇流可輕棄殘碑須把文章評

呂光迎

人字

遊沃洲山

巉空遙對姥山前支遁幽棲息萬緣勢壓臥龍蟠下府  
亭開放鶴近青天雲飛半嶺千村雨水落中洲一片田  
此日登臨須盡興馬跡歸暮識斜川

釋道猷

沃洲

連峰數十里脩竹帶平津茅茨隱不見雞鳴知有人

步踐其逕處處見遺薪始知百歲下猶有上皇民開此  
無事迹以待疎俗賓長嘯自林際歸來保天真

劉門山詩

王十朋

劉門山

澗水桃花路易迷不同人世不成蹊自從重入山中去  
煙雨深深鎖舊溪

徐漢

人字

過劉門山

萬峰聳翠白雲封遙望繁桃杳靄中仙子不知何處去

溪流猶帶落花紅

劉作樑

江西永新人字求全順治戊戌進士康熙八年任新昌令

遊劉門山

採藥人歸徑滿苔空山曉月自徘徊劉郎應有重來日

寄語桃花莫漫開

王愷之

人字

遊劉門山

仙山方以外綺樹簇爲鄰環珮飄丹爍胡麻泛碧津枯  
榮時遞換花鳥景長春洞口餘芳在閒來試一詢

呂震

人字



遊劉門山

莫認元都觀亦非沅水濱  
白雲逃淺渡蒼鹿飲平津  
寒盡山無歲源深花自春  
此中何所似未許外人詢

按劉晨阮

肇係剡人則劉門山疑卽劉阮住處

華頂峰詩

李

紳亳州人字公垂元和中進士官中書侍郎平章事

登華頂

欲向仙峰煉九丹獨瞻華頂禮真壇  
石標琪樹凌空碧水挂銀河映日寒  
天外鶴聲隨絳節洞中雲氣隱琅玕  
浮生未有從師地空誦元經想羽翰

寒泉一勺消百憂日暮增恍惚攀桂聊淹畱

茶圃

絕巘匿精廬蒼煙路孤迥草秀仙翁園春風發幽茗野  
僧四五人腦紺瞳子炯攜壺汲飛瀑呼我烹石鼎風濤  
江灘瀉天籟起林嶺七椀麇郝源一水鬪雙井我雖冠  
履縛心樂祇園靜濯足臥禪局夢墮蒙山頂

陳白

人字

墨池

八重峰頂望羣山百谷東流去不還惟有右軍遺蹟在  
月波時落墨池間

賈詩

人字

太白讀書堂

太白千載豪神遊渺湖海漠漠此中山而有書堂在磴  
斷綠蘿深澗寂寒泉瀉撫景一悲傷彷彿瞻雲彩

墨池

墨池千古覆青冥內史當年寫道經換却白鷺今不見  
空遺寒碧照山僧

諸葛義

登華頂

天台中峰秀華頂飛磴千盤若懸綆短筇單袂躡層雲

欲上寥天凌倒景呼吸真疑帝座通  
軒軒兩腋生長風  
平吞吳越了可辨下見一氣青冥濛  
曾看夜半日初吐  
金輪湧出珊瑚宮赤光倒射蕩青壁  
萬壑嵐翠流煙虹  
稽首開山智者尊一枝妙法標南宗  
首楞嚴未入東土  
獨契懸解叅元同法源近涸龍象立  
日落山鬼吟悲風  
太白書堂已陳迹右軍池水今猶黑  
寶篋斷礎沿荆榛  
尚記降魔一拳石文心慧業邈千秋  
獨有煙霞借顏色  
我亦前身許遠游吏情蕭散宜滄洲  
重來欲借九節杖  
瓊臺雙闕窮冥搜更呼寒拾招閭丘  
共上一萬八千之  
上頭下看人世如蜉蝣

太白讀書堂

太白已千載書堂今在茲丹青銷畫壁苔蘚沒殘碑山  
暝涼生早天長鳥去遲屋梁新月色彷彿見鬚眉

墨池

逸少曾遊處方池一水渾蝌文丁有尾苔迹鳥畱痕墨  
妙還誰繼流風尚有存微吟澹將夕隨意坐雲根

王立程

陟華頂下桐柏仄徑

水末天垂苦霧濃雨餘疎磬落孤峰沿溪怪石奔狂象  
倒壑腥風吼毒龍藥竈自燒丹蘚剝禪扉誰啓白雲封

憑空已覺身如幻濟勝何煩九節筇

陳函輝

華頂放歌

語云台山四萬八千丈一丈須當遊一日我今一日登  
其巔手扶太清袖霞霽此去帝座應不遠下界蟣臣乘  
間叩闕抒短悃華峰幾奏驚人篇願遣謫仙與臣一酬  
反臣饑欲死無人憐竈前菜瀋呼蒼天首陽餓士亦僕  
射盈虛消息之理然不然臣聞司馬承禎出山梅山中  
猿鶴今安在願得借臣希有鳥逍遙乎六合之前九州  
之外臣腕有鬼不能塗鴉賜臣墨池一頃奇字五車陞

下用臣術能浴日而耕海盍往觀乎降伏四魔惟臣與  
顓帝聞此語發大喇湖海狂生狂不易前身金粟後青  
蓮給與寒山一片石

顏邁

已定石梁華頂之遊澹軒司李復命治壺觴先發  
予以病不獲偕往悵賦

名山多截業台嶽自巔崦蔥鬱重崖護紆迴複澗盤峻  
從金地陟奇許石梁看雲抱層巖迴天懸疋練寒降魔  
原有塔朝斗詎無壇徑仄捫蘿險峰高放眼寬瓊臺恣  
眺詠石室遂盤桓碑碣苔空蝕陳隋寺未殘名花披錦

繡脩園壘琅玕黃獨堪爲膳青精更可餐荷鋤惟種藥  
燒鼎擬藏丹夜月來猿鶴春風長蕙蘭鳳笙聲噦噦玉  
女珮珊珊是水腸堪滌隨緣膝易安良朋偕座右爽氣  
集睂端已命攜柑酒相將整羽翰最宜超濁世并得伴  
黃冠鳥語聯新句松濤拂素紉追隨真踴躍步履忽蹣  
跚抱病緣多薄尋仙興已闌豪情歸逝水雅約負青鸞  
伏枕成孤悶歸途祇自嘆葛元曾構舍沈約且辭官用  
訂重遊展長歌賦考槃

何紘度

偶談華頂之勝往遊已四十年



禮經臺畔撫羣靈萬八峰瞻出杳冥曉日東移涵水赤  
寒潮西對接天青少文臥灸衡巫畫元亮吟來山海經  
壯志攀緣成幻泡空懷高舉摘辰星

洪若臯

墨池

逸少風流寄墨癡蓮峰縱屐且臨池斷碑蝌跡浸苔跡  
一水松煙點石緇芳草應酬康樂韻遊鱗不失葛翁期  
山陰未竟揮毫興半畝方塘日影移

施潤章

華頂

丹臺側磴少人行莽莽羣山合太清江海乍浮雙練窄  
雲霞重壓赤城平九天鸞鶴飛難到一寸松杉凍不生  
曉霧漫應遮老眼蓬萊看日舊分明

潘耒

華頂峰

崑崙之脈從天來散作嶽鎮千瓊瑰帝愁東南勢傾削  
特聳一柱名天台天台環周五百里金翅擘翼龍分胎  
峰巒一一插霄漢澗瀑處處奔虹雷華頂最高透天頂  
萬八千丈青崔嵬乘雲御風或可上我忽到之亦神哉  
遊氛豁盡日當午洞視八表無纖埃南溟東海白一杯

括蒼鴈宕青數堆千峰簇簇蓮華開中峰端嚴一蓮臺  
華藏世界宛如此醯雞不識良可哀渺茫誇閬苑荒忽  
求蓬萊何如天台靈異在人境劫火不到無三災神泉  
自流琪樹不栽彌山藥草滿谷丹材應真隱顯混樵牧  
飛仙遊戲同嬰孩羲之乏靈骨太白非仙才已往神山  
却歸去空餘石屋寒蒼苔我已夢覺牆根槐安能更逐  
魚龍厖徑須習定棲峰頂飽看滄桑三百回

茅蓬雜詠

天台六十五茅蓬總在懸崖絕澗中落盡山花人不見  
白雲堆裏一聲鐘

其二

矮屋低簷礙客冠  
繩牀土竈坐團圞  
定餘滿室生虛白  
儘抵三千世界寬

其三

溪山佳處結茅新  
買地無勞問主人  
耐得封山三丈雪  
從君高臥一千春

其四

分齋遠就隔溪菴  
汲水樵雲老尚堪  
莫訝孤單無伴侶  
應真五百是同叅

裘璉

## 華頂峰

丹崖臨絕巘翠壁杳無際不知何洞天但覺非人世重  
登最高頂羣峰訝初墜瑤草被層巖琪花綴古樹攀蘿  
梯仄經驚魂定復悸初喜置身高漸覺欣成畏青鳥不  
可騎赤松亦難記長生非不佳採藥知何地瓊樓高更  
寒一望生長喟

## 陳王謨

### 登華頂峰

天台一萬八千丈華頂峰高踞其巔衆山簇簇作環衛  
左拱右揖如朝天上窺雲漢不咫尺星辰歷歷看倒懸

俯視東海波汹涌括蒼天姥在眼前錢塘入海幾千里  
舉手欲指一線穿我遊天台愁力怯赤城路峻更桐柏  
金銀地嶺窮攀躋便欲登峰更造極千巖萬巘陟嶮崎  
緣崖捫澗憂傾跌罡風蓬蓬忽然起空中吹我雲煙裏  
茫茫四顧碧天淨隔斷塵寰幾萬里但覺雲從足底生  
一身寥廓同糠粃遙情逸思更何窮槐根蝸角真是恥  
沉吟獨立悲古今日暮歸途萬山紫回首煙雲天上來  
側身悵望空徙倚

許君徵

九日登華頂峰同朱子循賦

蓮華峰峻壓羣巒此日升躋四望寬霧散三山滄海闊  
風生萬壑翠濤寒巖前墜葉依人舞天半茱萸帶笑看  
攜得驚人詩句在直排閭闔奏雲端

華頂觀日

華頂雲開處扶桑日出時一輪金鏡湧萬道彩虹馳霞  
氣滄溟蕩天光閭闔移仰觀通帝座賦就獻彤墀

太白書堂

太白摘仙人神交已千載欲尋讀書堂縹緲白雲外

釋大經

登拜經臺

絕頂捫蘿上悠然興莫窮乾坤一圖畫日月兩燈紅

玉霄峰詩

孟浩然

玉霄峰

上盡崢嶸萬仞巔四山圍繞洞中天秋風吹月瓊臺曉  
試問人間過幾年

皮日休

襄陽人字襲美咸通中及第後爲黃巢所殺有詩文集滑臺集十卷

玉霄峰

青冥向上紫霄峰元始崔嵬聳玉容曉案瓊文光絕壁  
夜壇香氣襲靈松雲根怪石儀青鳳潭底寒泓臥黑龍



步水瓊臺忘世路分明半席誰棋從

陸龜蒙

松陵人字魯望舉進士不第號江湖散人又號天隨子甫里先生有笠澤叢書詩文行世

玉霄峰

天台四萬八千丈師在雲間啓竹扉永夜祇知星斗近  
秋深猶見海山微玉壇曾降青旄節雪壑長披白羽衣  
聞說靈壇富芝草何須重問首陽薇

一本所載皮陸詩與此不同皮日休詩青冥向上玉霄峰元始先生戴紫容曉案瓊文光洞壑夜壇香氣惹杉松間迎仙客來爲鶴靜嘆靈符去是龍子細捫心無俗骨欲如師住肯相容陸龜蒙詩天台一萬八千丈師在雲端掩竹扉永夜祇知星斗大深秋猶見海山微風前幾露青旄節雪後應披白羽衣南望煙霞空再拜欲將魂魄問靈威

余爽

玉霄峰

乘風御雲氣來訪真人家玉闕麗朝景瓊壺散晴霞高  
臨太元天下盼赤水涯陰魄位霜彩陽精發丹華桐君  
奉元書姹女弄絳紗祥虹舒五色神芝秀三葩煌煌王  
母居飄飄紫花車颺輪動無跡風馬去亦賒矯首挹浮  
丘躡屐追皇媧珠宮俯台斗石橋礙流槎操持却日鞭  
跨踏食月蛙龍旗拂煙驚鶴袂策雲斜清都隱虛無金  
庭鬱嵯峨橫霄雜美氣空界流浩波橐籥勞吹噓吐納  
煩羲和倏爾度劫灰超然絕塵羅靈簫步何徐玉斧髮

已睂飛駕逐鳳吹班鱗奏鸞歌寧畱飲青精幸我栽胡  
麻交梨瑩肝膽火棗醒齒牙咽嗽華池津咀嚼碧奈花  
有待越三井思慮無由邪

放鶴峰詩

王 鈍

人字

放鶴峰

昔人跨鶴絕幽踪此地空遺放鶴峰  
鶴去不還人不見春風芳草綠茸茸

巾子巖詩

釋傳燈

巾子巖

維石巖巖立，脩然君子容。  
還疑陶靖節，不減郭林宗。  
雪瀑寒多少，春山翠幾重。  
頻將雙短鬢，繚亂白雲封。

隱巖詩

王夔

人字

冬日遊隱巖

一陽來復日，又上隱巖頭。  
風日先春暖，壺觴傍日幽。  
素煙穿落水，青嶂映寒流。  
拭目千年景，驚心兩鬢秋。  
笑看飛漢鳥，閒逐睡沙鷗。  
行樂都無訝，人生夢裏遊。

麻姑巖詩

任晟

人字

遊麻姑巖

選勝任婆娑探奇自嘯歌麻姑肯再訪青鳥定相過徑  
冷迷煙雨巖幽織薜蘿塵埃能解脫應爲賦槃阿

題字巖詩

石余亨

人字

題字巖

前輩高風不可追自來陵谷互推移却憐當日題名者  
不及征南辨雨碑

顧儒嶺詩

盧 濬

歡輿道中

宛宛踰平麓冥冥歷翠微  
煙林騰鳥語雲石混苔衣  
倦得肩輿穩清便澗水肥  
時踪空繫眼誰憶謝元暉

張利璜

過歡輿

翠微深處路重重遙想丰標千載逢  
芳草白雲人不見至今野老說高蹤

金地嶺詩

陳函輝

金地嶺

鷲嶺疑天上誰於此布金溪聲長帶雨野暝乍投林共  
挈龍陂杖來尋鳥道岑石梁吾舊識披棘好招尋

潘耒

金地嶺

九里松風十里泉徐徐送客上青天不知華頂高多少  
已覺羣峰帖地眠

銀地嶺詩

潘耒

銀地嶺

誰道山僧徹骨貧眼前大地總金銀我居金嶺君銀嶺  
劃破虛空露主賓

察嶺詩

許君徵

察嶺

高公樓通處碧嶂嶺千盤日暮攀蘿上松風入袂寒

張利璜

度察嶺

孤標已逐海桑更嶺上猶畱高士名寂寂空山寒日影  
亭亭老樹撼風聲



羅漢嶺詩

鄭伯熊

人字

羅漢嶺

蒼髯白甲老煙雲萬木叢中獨挺身一柱擎天須此物  
執柯他日屬何人

關嶺詩

許君徵

度關嶺

雲橫絕壁嶺千盤萬壑松濤捲袂寒欲度關山愁日暮  
眼前誰作棄繻看

重度關嶺

重陟關山道，岩堯不易登。  
澗鋪前度雪，巖掛幾時冰。  
落日催遊子，寒雲臥老僧。  
何年息塵鞅，靜坐聽南能。

雙溪詩

曹文晦

雙溪夜坐

微月懸孤榻，殘雲過斷藤。  
松風林外笛，茅屋水邊燈。  
久坐忘爲客，清吟未得朋。  
沙頭有饑鶻，昏暝亦飛騰。

夏鍬

雙溪路

細路迢迢縈翠微竹輿披草露翻頭午時正坐妙蓮閣  
指點羣峰下夕暉

惆悵溪詩

陳繼疇

惆悵溪

溪邊送別意徘徊水自東流花自開願作峰頭雲一片  
朝朝莫莫去還來

許君徵

惆悵溪

不見珮環響惟聞惆悵聲阮郎如再至莫道水無情

張利璜

鳴玉澗

白雲片片綠波橫  
風送潺湲戛玉鳴  
流水遠隨桃瓣去  
至今猶聽珮環聲

靈溪詩

許渾

發靈溪館

山多水不窮  
一葉似漁翁  
鳥浴寒潭雨  
猿吟暮嶺風  
雜英垂錦繡  
衆籟合絲桐  
應有曹溪路  
千巖萬壑中

鄭巢

靈溪

孤吟疎雨外荒館亂峰前  
曉鷺棲危石秋萍滿敗船  
潛從華頂落樹與赤城連  
已有求閒意來期在暮年

青溪詩

曹文晦

九月青溪道中

老樹依沙岸柴門上下鄰  
斷橋歸郭路細雨過溪人白  
鷺雙飛去黃花數點新  
惜無遺世客聯句坐苔茵

袁日華

天台人字實齋秀水訓導

青溪

萬古意閒垂一谿釣猿近天上啼人移月邊棹無以墨  
綬苦來求丹砂妙華髮長折腰將貽陶公誚

玉京洞詩

洪适

玉京洞

鸞輪曾此宅靈仙洞府今稱第六天親往不辭蘿蔓險  
回看雲物起瓊田

余爽

玉京洞

羽駕歸來洞已扃洞門深鎖讀殘經瓊臺一覺仙都夢

不覺松根長茯苓

其二

東臨滄海晏羣仙誤入桃源小洞天一局殘棋消幾刻  
老龍鱗甲已蒼然

其三

半山松柏散天聲芝蓋當年憩赤城我是上皇芸閣吏  
玉京應有舊題名

楊維禎

玉京洞

上界由來足宮府玉京移得在人間赤城飛動霞當戶

銀漢下垂星滿壇響石忽聞人語答鳳笙時逐鶴聲還  
宰官喜在神仙窟何必更尋勾漏丹

王正億

人字

玉京洞

發興繞天涯赤城千丈霞登臨秋日霽吟詠晚風斜樹  
密遮虛洞山寒集晚鴉桃源還浪跡此地擬爲家

施閨章

玉京洞

靈城非遐壤丹樓聳天造本末出層標雲歸展衆妙玲  
瓏初景明爛熳夕陽照紆磴闕窅冥飛策俯寒峭玉洞



虛無人延日肆孤嘯餐霞蘊奇賞采芝企高蹈逝將物  
外蹤汗漫窮仙嶠

丹霞小洞詩

許君徵

遊丹霞洞

古洞藏深麓盤旋磴路悠雲依巖樹宿水傍石壇澆煉  
藥丹爐冷朝元石室幽日斜松韻起笙鶴儼峰頭

圓通洞詩

洪若皐

圓通洞

穿巖方丈地洞口白雲深蒼木盤沙徑流泉間竹林蟬  
鳴山愈靜亭古日皆陰長晝寂無語石頭相對吟

釋傳燈

圓通洞

一穴才容膝居然景自幽溪聲長在耳山色已盈眸  
契我林間性甘茲物外遊倦來枕石臥身世復何求

劉阮洞詩

元稹

河南人字微之

遊桃源洞

仙洞千年一度開等閒偷入又偷回桃花飛盡秋風起

何處消沉去不來

其二

芙蓉脂肉綠雲鬟  
畫樓臺青黛山  
千樹桃花萬年藥  
不知何事憶人間

曹

唐

粵西桂州人字堯賓寓天台後爲荆湘從事

擬桃源詩四首

樹入天台石路新  
雲和草色迥無塵  
煙霞不省生前事  
水木空疑夢後身  
往往雞鳴巖下月  
時時犬吠洞中春  
不知此地居何處  
須就桃源問主人

右擬劉晨阮肇游天台

殷勤相送出天台  
仙境那能得再來  
雲液旣歸須強飲

玉絨無事莫頻開  
花當洞口春長在水向人間去不回  
惆悵溪頭從此別  
碧煙明月鎖蒼苔

右擬仙子送劉阮出洞

不將清瑟理霓裳  
塵夢那知鶴夢長  
洞裏有天春寂寂  
人間無路月茫茫  
玉沙瑤草連溪碧  
流水桃花滿澗香

曉露風燈易零落  
此生無處問劉郎

右擬仙子洞中懷劉阮

再到天台訪玉真  
青苔白石已成塵  
笙歌寂寞閒深洞  
雲鶴蕭條絕舊鄰  
草樹總非前度色  
煙霞不似往年春  
桃花流水依然在  
不見當時勸酒人

右擬劉阮再到天台不復見仙子

高述

字襲以紹聖三年任寧海令以循良稱

流花亭

聲簷臨古岸玉砌近重闌指點尋仙路畱連勸酒人水流還是舊花落又逢春客到此亭下眷言休問津

章憑

通判

人字

紹興三年以承議郎任台州

用前韻

亭旁得佳石山嵐擁樹闌風流傳晉客談笑憶秦人木出桃源路花浮洞府春未應迷俗駕行處是通津

晁公爲

州軍

人字

建炎三年以直顯謨閣知台

桃源洞

桃花開已繁溪水濺濺去不見持盃人自嘆來何暮

左禕

人字

人字

桃源洞

劉郎何用憶塵寰舊路重尋事已難古意飄零無處覓  
藤紫溪色上闌干

洪适

桃源

桃花當日未成蹊只有幽禽語舉微楚岫行雲初入夢  
秦臺鳴鳳要同飛仙家長若三春好人境何知萬事非  
訪問丘園荒舊蹟却應回首悔來歸

吳師正

人字

桃源洞

天台春暖蘭若馨海榴吐血黃鳥鳴風晴雨霽洞天曉  
畫屏有路遊人行劉郎阮郎剡溪客結伴窮幽絕人跡  
洞口遙聞漱玉聲時有飄英點溪碧捫蘿涉水前攀緣  
瞥見勝景層帷巔天桃瓊草蔓深谷飛流傑閣凌青煙  
潭上金橋跨龍背綽約雙鸞飲潭水初疑帝子別瀟湘  
珠佩珊珊來玉趾瑰姿瑋態躊躇久熟視人間未嘗有  
羅幔深沉邀客畱胡麻爲飲椒漿酒問郎於此何當還  
壺中景好非塵寰客驚遽返覓間里子孫在在皆重玄  
年華瞬息嘆浮世往事分明如夢寐相與迴尋舊路悲  
亂山稠疊煙霞蔽我來躡履觀遺蹤松陰坐久曾不逢

野僧相引下山宿落霞斜日林梢紅

謝鐸

重遊桃源

三十年來到此曾竹牀猶憶寢還興青山未老風光在  
白髮重來感慨增往事忽驚春後夢浮名真愧佛前燈  
拂衣又是明朝路天姥峰頭第幾層

毛漸

入字

桃源洞

洞門流水日潺湲桃塢依然枕水邊春色年年花自好  
遊人誰復遇嬋娟



下 丕

人字

桃源

桃源渺何許雲樹隔重重紅透落花水青攢過雨峰等  
幽還著屐涉險更扶筇仙子終難遇含情獨倚松

陳

瓚

天台人字宗器正德庚午舉人官上元令有  
霞山漫草

桃源洞

曾記齠年到而今四十霜無由蛻凡骨何處覓仙郎湘  
水空祠地巫山幻夢鄉登臨一弔古回首未斜陽

王明汲

和桃源詩四首用唐人韻

天台深處露華新，碧樹蒼崖靜絕塵。  
足躡白雲知勝地，影隨明月覺閒身。  
藥苗識盡仙山味，桃片疑來別院春。  
轉過石邊還有徑，紛紛花事正撩人。

右擬劉阮入天台

纔邀風月聚天台，又報仙郎歸去來。  
清瑟却因惆悵罷，瓊樽聊爲別離開。  
從今鶴夢芳塵杳，何日魚箋錦字迴。  
知到人間春正晚，滿溪花雨浸莓苔。

右擬送劉阮出洞

雲爲衣袂薜爲裳，洞裏春深思更長。  
到枕松風還寂寞，隔窗蘿月自微茫。  
鸞凰不作塵凡夢，雞犬猶聞藥鼎香。  
獨對空山無限景，斷魂仙草憶仙郎。

右擬仙姬憶劉阮

誤入桃源幻似真，重來更入隔紅塵。  
欲尋古洞雲迷路，

還認前溪水作鄰啼鳥有情憐舊客落花無主惜殘春  
仙緣再續何時續搔首東風悵玉人

右擬劉阮再到天台不見仙子

李天秩

和桃源詩四首用前韻

花雨繽紛滿目新翠微深處靜無塵鹿脚芝草仙家路  
山鎖明霞物外身疊嶂陰森疑玉露雙娥綽約若晴春  
金橋玉澗神仙府錯認秦時避世人

右和劉晨阮肇入天台

採藥隨雲到上台塵思未盡亦虛來初逢桃實千峰換  
又飯胡麻一徑開好好鸞膠何日續翩翩鶴駕幾時迴

名花闌艷山光悅却趁春風襯錦苔

右和仙子送劉阮出洞

偶授霞裾雲錦裳春風駘蕩日初長徘徊洞府殊清切  
邂逅光陰亦渺茫流水有心瓊瑩汎空山無侶百花香  
幾回悵脰當芳序人世那堪住二郎

右和仙姬懷劉阮

昨入仙源却似真分明記得絕埃塵蝶蜂不到雲霧障  
雞犬無聲山是鄰曲曲花溪融白晝茸茸芝徑惜長春  
蓬瀛詎是無尋覓相對佳山如美人

右和劉阮再到天台不見仙子

周

振

武進人字

嘉靖十一年任天台令

### 桃源洞

劉阮遺踪不可求煙霞深鎖洞門秋吟餘惆悵溪頭水  
鳴咽於今尚未收

諸葛義

遊桃源洞

一徑入溪口仙源窅難窮層崖削千仞芳樾蔓菁蔥昔  
聞採芝人忽與仙姝逢粲粲彼姝子翩翩冰雪容眷言  
託真契乘鸞戲煙空靈境一以闕山花猶自紅步履訪  
遺事澗香吹藥叢流憩至日夕永懷塵外蹤

王士性

桃源洞

君不見劉阮相將出洞天洞門轉盼埋蒼煙花開花落  
誰爲主寥落壺天幾歲年我亦天台採芝客來往青山

訪陳跡萬樹天桃隔綵霞  
髣髴仙娥落空碧記得津迷  
採藥郎桃花流水偶相望  
隱隱胡麻來石髓雙雙玉女  
下天香雲鬟翠黛流蘇帳  
伉儷不殊人世狀仙家雞犬  
日月賒七日滄桑何泮蕩  
塵心忽自憶人間一別仙源  
遂不還白石蒼苔翳舊路  
瓊樓玉宇掩重關狐兔爲冢  
莽荆棘煙霧茫茫招不得  
鑿石誅茅發隱淪我與山川  
生氣色古陌無津不記春  
敢希邂逅望仙塵但得指點  
漁郎道弗被桃花解笑人

戴唐獻

臨海人字伯言著有蕉雨軒集與姪杏芳有大小戴之目

擬劉阮別仙子和唐人韻

注籍仙凡本上台偶因鋤藥到山來何緣玉杵生前約  
不解琪花別後開夢斷巫山今夜雨字傳織女錦機迴  
一般也有尋真客須遣仙龐守綠苔

戴杏芳

臨海人字

惡溪舟中

高秋耐可覓槎牽雨後懸流迅日邊問水樹從人面過  
瞻巖舟到客思前元經失辨龍蛇勢危石頻驚虎豹穿  
好語彝齊鄰是卜子今欲買此山田

陳子龍

雲間人字臥子崇禎間進士靖節

劉阮洞

空翠映微暘深靄媚初夕參差羣峰秀四顧絕行迹冷  
冷哀湍瀉瑟瑟衰林槭杳冥結雲車鮮妍潤泉石緬想  
蘭皋步翹見瑤華摘真景忽若■靈姿竟安適疲情煙  
霞際蕩志清虛籍綢繆淡思慮游戲非阡陌神遇  
悲一往成疇昔騁望白雲阿躑躅繁憂積

洪若臯

桃源洞

遙遙仙子洞門關斬去蒼藤萬仞山不使劉郎輕再面  
金橋何處戲雲鬟

胡雲客



訪桃源洞

三月桃源路天桃始放花  
虛聞采靈藥不見飯胡麻  
一水乘新漲千峰映落霞  
還疑雲霧裏彷彿有仙家

潘耒

桃源

桃源無桃花山水仍佳絕  
始至覺蕭疎漸深愈幽折  
雙崖爲曲屏組繡對披列  
石淨不受苔松清如漱雪  
山寨途若窮溪迴境仍別  
碧潭清若空倒影諸峰潔  
珠簾掛重重雲際露潛穴  
仙居旣清高塵滓非所屑  
如何啓劉阮世緣忽膠結  
遂令惆悵溪步步生悽咽  
可憐欲界仙

情根曾未徹誰能喝金橋道人心似鐵

張聯元

桃源洞

幽篁曲徑碧森森  
桃花自古今洞繞煙蘿空有跡  
途迷劉阮本無心  
浮杯漫憶胡麻飯  
鳴玉誰叅仙珮音  
重見金橋恐浪語  
三峰憑鎖白雲深

朱潮

望桃源洞

台山碧峩峩洞口春漠漠  
不見雙娥還唯見桃花落

張銑

桃源和韻

好風送爾到天台忽引離情入抱來  
澗水不能同客住洞門應復爲君開  
青山放鶴終長往空谷辭雲可再回  
別後相尋相憶否漫稱陰雨阻蒼苔

其二

入山殊幸遇仙真舊路重尋化劫塵  
半載鸞凰如隔世一時雞犬已無鄰  
東峰猶認雲鬟曉碧澗疑聞玉佩春  
攜手相從竚立久多情尚待別時人

許君徵

劉阮行

劉阮採芝入山谷山路縈迴曲復曲水盡旋看山色青  
山窮又見澗水緣行行山路無窮止煙霧茫茫籠澗水  
但聽猿猿繞樹啼無數鳥聲幽谷裏忽然玉盃泛胡麻  
相驚深處有人家遡流直至山深處洞口灼灼燦桃花  
雲際樓臺若圖畫珠簾掩映清泉掛鵲鵲孔雀錦雞鳴  
琪花瑤草何光怪二女雲霞佩陸離笑謂郎君來何遲  
入室錦屏雲母列紅蘅碧杜香風吹吁嗟仙境難久寓  
悠悠人世須臾度思家惆悵別溪頭水聲嗚咽朝復暮  
玉書欲寄無鶴傳明月蒼苔夜夜懸壺今洞口水長在  
那見雙姝戲水邊

桃花符星同遊諸友

等春偶入桃花塢塢上桃花紅正吐席地開樽草作茵  
美人並坐牽芳杜朱唇微起發清歌香風飄處飛紅雨  
誰敲羯鼓更催花醉折花枝羣起舞堪歎人生歡幾何  
花開不飲空蹉跎今日看花樂事多爲君起舞爲君歌  
休言落日墜江波還有明珠照綺羅君不見桃花洞口  
舊主人曾將歌舞度芳辰祇今惟有桃花在歲歲年年  
長自春

擬劉阮訪舊

蘿窗石徑世間稀重訪仙源路已非流水聲中聞玉珮

夕陽影裏見霞衣書教舞鶴雲邊寄夢逐啼猿夜半歸  
堪歎桃花隨處放却殊洞口對芳菲

尋劉阮採藥遺跡

古洞幽尋正及春桃花簇簇洞門新雲中縹緲仙裳杳  
溪上翻飛青鳥頻靈藥滿山誰更採玉書畱篋贈何人  
松間白鶴聞清唳爲我傳書寄肇晨

閨秀

潘氏

提學潘顧女適裴致中著有碧天吟稿

桃源洞

千年老樹萬年山洞口仙娥自玉顏劉阮當時那得見

浪傳浮跡在人間

其二

天接青山路萬重  
仙家洞口白雲通  
聽殘一夜溪頭雨  
流出桃花幾片紅

其三

久說桃源洞裏深  
桃源洞裏果沉沉  
憑誰爲指通仙路  
遙見雙姝接語音

般若臺石詩

釋傳燈

幽溪般若臺

亭亭磐石上長日作跏趺濁世隨榮辱浮名任有無苔  
痕依水綠松蓋倚巖孤麋鹿情相契恒來伴野夫

曇猷拜石詩

陳函輝

曇猷拜石

九年畱壁影慈力每微探袍笏何人拜袈裟此地叅水  
因心是石花與佛俱曇不用湔腸韭清禪映碧潭